

折

獄

龜

鑑

補

折獄龜鑑補卷五目錄

用法惟公

奪藥悟王

犯蹕罰金

正矯制罪

矯制請罪

議族郭解

知上書詐

縛假太子

捕公主奴

格舍中兒

治陰氏客

德感猛獸

不私故人

議擅發罪

募士平盜

中牟三異

直斥豺狼

以禮教民

寬亡卒罪

不可殺降

刑宜下吏

分界按圖

用法宜平

臣惟守法

釋嫌止殺

發冢不罪鄰

開門疑賊

測囚時刻

察訪民瘼

諫逋亡連坐

知謗訕誣

賜牛息爭

不私親故

力止妄殺

露坐聽訟

去流囚鎖

據律擬徒

陷人非德

徑釋罪囚

法守大信

止坐魁首

罵官杖殺

支黨非首

別病卒罪

餞飲非反

輕罪勿重

判逆臣子

失出過小

判重南山

刑期遠大

乞取贓輕

嚴治吏卒

誅舞文吏

殺壞器卒

內侍蔭子

議叛婦罪

杖弄權僧

杖抗債軍

杖無禮將

釋久繫囚

催積年賦

雪冤揮金

下手爲從

改敕救人

將卒互殺

放叫譟生

貸誤殺罪

枉殺有罰

殺馬視粟

截足事佛

牛無千斤

寬邊將罪

細審活盜

立斬妖賊

部校誣將

燒草弭盜

誣訟大臣

單馬諭賊

力除內賊

折服外藩

諭眾定亂

諭叛黜懦

痛抑姦吏

力辨活囚

止誅叛首

收挾持吏

治椎剽盜

弭鄰封盜

除害民僧

赦斬卒將

釋失教生

懲不法吏

諭眾勿亂

諭思歸卒

追斬叛卒

焚神杖巫

滅妖黨罪

徐誅悍卒

先散叛黨

自梏求神

痛抑頑民

擢帥安兵

主帥宜重

請除非刑

寬殺牛罰

卻金藉穀

罪難委奴

釋蠱獄罪

捕僧禁巫

立誅叛卒

用刑宜正

善御士卒

力杜妖妄

決反卒罪

斬扞杖卒

竄挾怨卒

免逗撓罪

諭民息訟

愛惜衣冠

寬限完逋

違制故失

軍謀不賞

奏免毀廬

議獄寬平

矜慎庶獄

鋤惡長善

坐告訐罪

厚譴宗室

治匿名書

妖人諱角

重入輕出

神帽非御服

發錢治卒

懲奴械吏

不媚權要

救諸將死

戲言當杖

赦亡卒罪

將亂莫弛

吏鞫現在

告神獲犯

祝詛自斃

斬將肅軍

饑民非盜

核倉吏罪

單車察寇

斬盜靖譁

斷田歸岳

不妄邀福

雪同飲冤

焚亂黨籍

募篆非寶

虛言無實

迎詔失儀

亂民非叛

察告逆誣

扼要弭亂

鉤奴察盜

察無叛情

杖犯禁僧

杖請屬豪

力折權要

呼名獲謀

紀律宜嚴

正逃將罪

矜募誅逃

誣告謀反

禁賣墳地

保降卒命

保全巨室

止礮渠魁

諭羌止亂

爲主宜旌

軍民無異

除強滑豪

盡縱俘民

恩威並用

釋輕罪囚

亟焚禁書

饑非故盜

雪冤得雨

求神冤白

毀磴灌田

官酷被戕

重懲惡奴

雪賣毒冤

罪別輕重

寬犯獵罪

齋禱明冤

驗身知冤

除造鈔害

因刀獲犯

寬註誤民

開譬息訟

勘案無私

斬劫掠帥

立碎大珠

平械鬪怨

明空印冤

別工匠罪

杖毆民卒

因蛙鞠罪

察謀逆冤

赦冒糧將

查志考圖

按名知妄

明日來



誅造誣囚

釋民焚籍

廉靜民安

寬饑民罪

安插流民

單騎入峒

寬鞭卒弁

妖言止杖

饑民非劫

李福達獄

陳洸獄

宗室奪掠

法治戚畹

法治中官

奸僧冒王

木偶躍舟

出入不平

定亂貴速

力除豪猾

微服被扶

折獄龜鑑補卷五

肅州胡文炳虎臣蒐輯

雜犯上

用法惟公

家語

高柴字子羔齊人孔子弟子爲衛士師別人之足俄而有  
蒯瞶之亂季羔逃之走郭門別者守門焉謂季羔曰彼有  
缺季羔曰君子不踰又曰彼有竇季羔曰君子不隧又曰  
於此有室季羔乃入焉旣而追者罷季羔謂別者曰吾不  
能虧主之法而親別子之足今吾在難而逃我者三何哉  
別者曰斷足固我罪也無可奈何曩者君治臣以法令先

人後臣欲臣之免也臣知之獄決罪定臨當論刑君愀然不樂見君顏色臣又知之君豈私臣哉天生君子其道固然此臣之所以悅君也孔子聞之曰善哉爲吏其用法一也思仁恕則樹德加嚴暴則樹怨公以行之其子羔乎

奪藥悟王

戰國策

有獻不死之藥於荆王者謁者操之以入中射之士問曰可食乎曰可因奪而食之王大怒使人殺中射之士中射之士使人說王曰臣問謁者曰可食臣故食之是臣無罪而罪在謁者也且客獻不死之藥臣食之而王殺臣是死藥也是客欺王也夫殺無罪之臣而明人之欺王也不如

釋臣王乃不殺

犯蹕罰金

漢書

上行出中渭橋有人從橋下走乘輿馬驚捕屬廷尉張釋之奏犯蹕當罰金上怒釋之曰法者天子所與天下公共也今法如是而更重之是法不信於民也且方其時上使使誅之則已今已下廷尉廷尉天下之平也壹傾天下用法皆爲之輕重民安所措其手足上曰廷尉言是也

正矯制罪

漢書

元鼎中博士徐偃使行風俗偃矯制使膠東魯國鼓鑄鹽鐵還奏事徙爲太常丞御史大夫張湯劾偃矯制大害法

至死偃以爲春秋之義大夫出疆有可以安社稷存萬民  
專之可也湯以致其法不能詘其義有詔下終軍問狀軍  
詰偃曰古者諸侯國異俗分百里不通時有聘會之事安  
危之勢呼吸成變故有不受辭造命專已之宜今天下爲  
一萬里同風故春秋王者無外偃巡封域之中稱以出疆  
何也且鹽鐵郡有餘臧正二國廢國家不足以爲利害而  
以安社稷存萬民爲辭何也偃窮詘服罪軍奏偃矯制專  
行非奉使體請下御史徵偃卽罪奏可

矯制請罪

漢書

汲黯字長孺濮陽人武帝時爲謁者河內失火使黯往視

之還報曰家人失火屋比延燒不足憂也臣過河南貧人傷水旱萬餘家或父子相食臣謹以便宜持節發倉粟以賑之臣請歸節伏矯制之罪上賢而釋之以爲東海太守治官理民好清靜擇丞史而任之其治責大指而已不苟小黠多病卧閨閣內不出歲餘東海大治上聞召爲主爵都尉

議族郭解

史記

郭解者河內軹人也少時陰賊感概不快意所殺甚眾以軀藉友報仇藏命作姦剽攻休乃鑄錢掘冢不可勝數及解年長更折節爲儉以德報怨然其自喜爲俠益甚旣以

振人之命不矜其功其陰賊著於心本發於睚眦如故云  
曾徙豪富茂陵衛青爲言郭解家貧不中徙上曰解布衣  
權至使將軍爲言此其家不貧解徙諸公送者出千餘萬  
軹人楊季主子爲縣掾鬲之解兄子斷楊掾頭解入關邑  
人又殺楊季主季主上書人又殺闕下上聞乃下吏捕解  
窮治所犯爲而解所殺皆在赦前軹有儒生譏解曰解專  
以奸犯公法何謂賢解客聞殺此生斷其舌吏以責解解  
實不知公孫宏議曰解布衣爲任俠行權以睚眦解雖不  
知此罪甚於解殺之遂族郭解

知上書詐

漢書

上官桀等詐令人爲燕王上書言霍光出都肄郎羽林道上稱蹕擅調益幕府校尉專權自恣疑有非常候光出沐日奏之桀欲從中下其事桑宏羊當與諸大臣共執退光書奏帝不肯下明旦光聞之止畫室中不入有詔召大將軍光入免冠頓首謝上曰將軍冠朕知是書詐也將軍之廣明都郎屬耳調校尉以來未能十日燕王何以得知之且將軍爲非不須校尉是時帝年十四尙書左右皆驚而上書者果亡捕之甚急桀等懼白上小事不足遂上不聽

縛假太子

漢書

有男子乘黃犢車詣北闕自稱衛太子詔公卿將軍中二



千石雜識視至者並莫敢發言京兆尹雋不疑後到叱從吏收縛曰昔蒯瞶違命出奔輒拒而不納春秋是之衛太子得罪先帝亡不卽死今來自詣此罪人也遂送詔獄霍光聞而嘉之曰公卿大臣當用有經術明於大誼者由是不疑名重朝廷廷尉驗治竟得姦詐本夏陽人姓名方遂居湖有故太子舍人謂曰子狀貌甚似衛太子方遂利其言冀以得富貴坐誣罔不道要斬

捕公主奴

漢書

董宣字少平陳留圉人爲雒陽令湖陽公主蒼頭白日殺人因匿主家吏不能得及主出行以奴驂乘宣候之駐車

叩馬以刀畫地大言數主之失叱奴下車因格殺之主卽  
還宮訴帝帝大怒召宣欲箠殺之宣叩頭曰陛下聖德中  
興而縱奴殺人將何以治天下乎臣不須箠請自殺卽以  
頭擊楹流血被面帝令小黃門持之使宣叩頭謝主宣不  
從強使頓之宣兩手據地終不肯俯主曰文叔爲白衣時  
藏亡匿死吏不敢至門今爲天子威不能行一令乎帝笑  
曰天子不與白衣同因敕強項令出賜錢三十萬由是強  
豪震慄京師號爲卧虎歌之曰枹鼓不鳴董少平

格舍中兒

漢書

祭遵字弟孫潁川潁陽人光武署爲門下史從征河北爲

軍市令舍中兒犯法遵格殺之光武怒命收遵時主簿陳副諫曰明公常欲眾軍整齊今遵奉法不避是教令所行也光武乃貫之以爲刺姦將軍謂諸將曰當備祭遵吾舍中兒犯法尙殺之必不私諸卿也尋拜爲偏將軍從平河北以功封列侯

治陰氏客

漢書

虞延爲洛陽令收考陰氏客馬成陰氏屢請獲一書輒加笞二百信陽侯陰就訴於帝帝乃親錄囚徒延陳其獄狀可論者在東無理者居西成乃回欲趨東延前執之謂曰爾人之巨蠹久依城社不畏熏燒今考實未竟宜當盡法

成大呼稱枉陞戟郎以戟刺延叱使置之帝知延不私謂  
成曰汝犯王法身自取之呵使速去後數日伏誅

德感猛獸

漢書

宋均爲九江太守郡多虎暴數爲民患常募設檻穽而猶  
多傷害均到下記屬縣曰夫虎豹在山鼃鼃在水各有所  
託且江淮之有猛獸猶北土之有雞豚也今爲民害咎在  
殘吏而勞勤張捕非憂恤之本也其務退姦貪思進忠善  
可一去檻穽除削課制其後傳虎相與東游渡江山陽楚  
沛多蝗其飛至九江界者輒東西散去由是名稱遠近後  
徵均爲尙書令均謂人曰國家喜文法廉吏以爲足止奸

也然文吏習爲欺謾而廉吏清在一己無益百姓流亡盜賊爲害也均欲叩首爭之時未可改也

不私故人

漢書

蘇章字孺文扶風茂陵人舉賢良方正遷冀州刺史有故人爲清河太守章行部欲案其姦賊乃爲設酒肴陳平生之好甚歡太守喜曰人皆有一天我獨有二天章曰今夕蘇孺文與故人飲者私恩也明日冀州刺史案事者公法也遂舉正其罪州境肅然

議擅發罪

漢書

王望字慈卿琅邪人以鍾離意薦拜議郎遷青州刺史甚

有威名是時州郡災旱百姓窮荒望行部道見飢者裸行  
草食五百餘人愍然哀之因以便宜出所在布粟給其廩  
糧爲作褐衣事畢上言帝以望不先表請章示百官詳議  
其罪鍾離意曰昔華元子反楚宋之良臣不稟君命擅平  
二國春秋之義以爲美談今望懷義忘罪當仁不讓若繩  
之以法忽其本情將乖聖朝愛育之旨乃赦之

募士平盜

漢書

虞詡字升卿陳國武平人舉孝廉拜郎中永初四年羌胡  
反亂殘破并涼大將軍鄧騭以軍役方費事不相贍欲棄  
涼州并力北邊乃會公卿集議騭曰譬若衣敗壞一以相

補猶有所完若不如此將兩無所保護者咸同謂曰今涼土擾動人情不安宣令四府九卿各辟彼州數人其牧守令長子弟皆除爲冗官外以勸厲答其功勤內以拘致防其邪計詔從謂議於是辟西州豪傑爲掾屬拜牧守長吏子弟爲郎以安慰之鄧騭兄弟以謂異其議因此不平欲以吏法中傷謂後朝歌賊甯季等數千人攻殺長吏屯聚連年州郡不能禁乃以謂爲朝歌長故舊皆弔之謂笑曰志不求易事不避難臣之職也不遇槃根錯節何以別利器乎及到官設令三科以募求壯士自掾史以下各舉所知其攻劫者爲上傷人偷盜者次之不事家業者爲下收

得百餘人使入賊中誘令劫掠乃伏兵以待之遂殺賊數百人又潛遣貧人能縫者傭作賊衣以綵線縫其裾有出市里者吏輒禽之賊由是駭散後羌寇武都鄧太后以詔有將帥之畧遷武都太守羌眾數千遮詔於陳倉嶓谷詔卽停車不進而宣言上書請兵須到當發羌聞之乃分鈔傍縣詔因其兵散日夜進道兼行百餘里令吏士各作兩竈日增倍之羌不敢逼或曰孫臏滅竈而君增之兵法日行不過三十里以戒不虞而今日且二百里何也詔曰虜眾多吾兵少徐行則易爲所及速進則彼所不測虜見吾竈日增必謂郡兵來迎眾多行速必憚追我孫臏見弱吾



今示強勢有不同故也既到郡兵不滿三千而羌眾萬餘  
攻圍赤亭數十日詡乃令軍中使疆弩勿發而潛發小弩  
羌以爲矢力弱不能至并兵急攻詡於是使二十疆弩共  
射一人發無不中羌大震退詡因出城奮擊多所傷殺明  
日悉陳其眾令從東郭門出北郭門入貿易衣服回轉數  
周羌不知其數更相恐動詡計賊當退乃潛遣五百餘人  
於淺水設伏候其走路虜果大奔因掩擊大破之斬獲甚  
眾賊由是敗散

中牟三異

漢書

魯恭爲中牟令專以德化爲理不任刑罰訟人許伯等爭

田累守令不能決恭爲平理曲直皆退而自責輟耕相讓  
亭長從人借牛而不肯還之牛主訟於恭恭召亭長敕令  
歸牛者再三猶不從恭歎曰是教化不行也欲解印綬去  
掾史泣涕共留之亭長乃慙悔還牛詣獄受罪恭貰不問  
於是吏人信服建初七年郡國螟傷稼犬牙緣界不入中  
牟河南尹袁安聞之疑其不實使仁恕掾肥親往廉之恭  
隨行阡陌俱坐桑下有雉過止其傍傍有兒童親曰兒何  
不捕之兒言雉方將雛親瞿然而起與恭訣曰所以來者  
欲察君之政迹耳今蟲不犯境此一異也化及鳥獸此二  
異也豎子有仁心此三異也久留徒擾賢者耳還府具以

狀白安是歲嘉禾生恭便坐庭中

直斥豺狼

漢書

張綱字文紀犍爲武陽人司空皓之子也舉孝廉爲御史  
漢安元年遣綱與杜喬周舉周栩馮羨欒巴郭遵劉班分  
行州郡表賢良顯忠勤其貪汚者使輒收舉喬等受命之  
部綱獨埋其車輪於雒陽都亭曰豺狼當道安問狐狸遂  
劾奏大將軍梁冀河南尹不疑曰冀兄弟蒙外戚之援荷  
國厚恩以芻蕘之資居阿衡之任不能敷揚五教翼贊日  
月而專爲封豕長蛇肆其貪叨甘心好貨縱恣無底多樹  
諂諛以害忠良誠天威所不赦大辟所宜加也謹條其無

君之心十五事書奏京師震悚時冀妹爲皇后諸梁姻族滿朝帝雖知綱言直終不能用時廣陵賊張嬰寇亂十餘年朝廷不能討冀乃諷尙書以綱爲廣陵太守欲以事中之綱單車之職徑詣嬰壘曉之曰前後二千石多肆貪暴故致公等懷憤相聚今主上仁聖欲以文德服叛故遣太守思以爵祿相榮不願以刑罰相加此誠轉禍爲福之時也嬰等泣下曰荒裔愚民不堪侵枉相聚偷生若魚遊釜中知其不可久且以喘息須臾間耳今聞明府之言乃嬰等更生之辰也遂面縛歸降

以禮教民

漢書

卓茂字子康南陽宛人也由黃門郎遷密令視民如子舉善而教口無惡言吏人親愛而不忍欺之人常有言部亭長受其米肉遺者茂曰亭長爲從汝求乎爲汝有事囑之而受乎將平居自以恩意遺之乎人曰往遺之耳茂曰遺之而受何故言邪人曰竊聞賢明之君使民不畏吏吏不取民今我畏吏是以遺之吏旣卒受故來言耳茂曰汝爲敝人矣凡人所以貴於禽獸者以有仁愛知相敬事也今鄰里長老尙致饋遺此乃人道所以相親況吏與民乎吏顧不當乘威力彊請求耳凡人之生羣居雜處故有經紀禮義以相交接汝獨不欲修之甯能高飛遠走不在人間

邪亭長素善吏歲時遺之禮也人曰苟如此律何故禁之  
茂曰律設大法禮順人情今我以禮教汝汝必無怨惡以  
律治汝汝何所措其手足乎一門之內小者可論大者可  
殺也且歸念之於是人納其訓吏懷其恩教化大行道不  
拾遺平帝時天下大蝗河南二十餘縣皆被其灾獨不入  
密縣界

### 寬亡卒罪

魏志

高柔爲丞相理曹掾鼓吹朱金等在合肥亡逃舊法軍征  
士亡考竟其妻子太祖患猶不息更重其刑金有母妻及  
二弟皆給官主者奏盡殺之柔啟曰士卒亡軍誠在可疾

然竊聞其中時有悔者愚謂乃宜貸其妻子一可使賊中不信二可使誘其還心正如前科固已絕其意望而猥復重之柔恐自今在軍之士見一人亡逃誅將及已亦且相隨而走不可復得殺也此重刑非所以止亡乃所以益走耳太祖曰善卽止不殺

### 不可殺降

魏志

太祖西征馬超河間民田銀反世子丕遣賈信討滅之餘賊請降議者皆曰公有舊法圍而後降者不赦奮武將軍程昱曰此乃擾攘之際權時之宜今天下畧定不可誅也必欲誅之宜先啟聞議者皆曰軍事有專無請昱曰凡專

命者謂有臨時之急耳今此賊制在賈信之手故老臣不願將軍之行也不曰善卽往白太祖果不誅太祖還謂昱曰君非徒明於軍計又善處人父子之間

刑宜下吏

魏志

王肅字子雍東海人司徒朗之子也太和中爲散騎常侍青龍中領祕書監魏主性嚴急督修宮室有稽限者親召問之言猶在口身首已分肅諫曰陛下臨時所刑皆有罪之吏然眾庶不知謂爲倉卒願下之吏暴其罪而誅之無使汙宮掖而爲遠近所疑昔漢文帝欲殺犯蹕者張釋之曰方其時上使誅之則已今下廷尉廷尉天下之平不可



傾也臣以爲大失其義廷尉天子之吏也猶不可以失平而天子之身反可以惑謬乎是重於爲己輕於爲君不忠之甚也周公曰天子無戲言言則史書之工誦之士稱之言猶不戲而況行之乎故釋之之言不可不察周公之戒不可不法也

分界按圖

魏志

孫禮遷冀州牧司馬懿謂禮曰今清河平原爭界八年更二刺史靡能決之虞芮待文王而了宜善令分明禮曰訟者據墟墓爲驗聽者以先老爲正而老者不可加以榎楚又墟墓或遷就高敞或徙避仇讐如今所聞雖皋陶猶將

爲難若欲使無訟當以烈祖初封平原時圖決之何必推古問故以益辭訟今圖藏在天府便可於坐上斷也豈待到州乎

用法宜平

晉書

荀勗字公曾潁川潁陰人漢司空爽之曾孫也爲廷尉正參司馬昭軍事賜爵關內侯魏主髦之討司馬昭也大將軍掾孫佑等守閭闔門昭弟安陽侯幹聞難欲入佑謂幹曰未有入者可從東掖門及幹至昭遲之幹以狀白昭欲族誅佑勗諫曰孫佑不納安陽誠宜深責然事有逆順用刑不可以喜怒爲輕重今成倖刑止其身佑乃族誅恐義

士私議乃免佑爲庶人時官騎路遺求爲刺客入蜀勸言  
於昭曰明公以至公宰天下宜杖正義以伐違貳而命以  
刺客除賊非所謂刑于四海以德服遠也昭稱善

釋嫌止殺

晉書

傅祗字子莊北地泥陽人魏太常嘏之子也累遷侍中時  
將誅楊駿而駿不之知祗侍駿坐而雲龍門閉內外不通  
祗請與尙書武茂聽國家消息揖而下階茂猶坐祗顧曰  
君非天子臣邪今內外隔絕不知國家所在何得安坐茂  
乃驚起駿旣伏誅裴楷息瓚駿之壻也爲亂兵所害尙書  
左僕射荀愷與楷不平因奏楷是駿親收付廷尉祗證楷

無罪有詔赦之時又收駿官屬祇復啟曰昔魯芝爲曹爽司馬斬關出赴爽宣帝義之尙遷青州刺史駿之僚佐不可加罰詔又赦之祇多所維正皆如此

發冢不罪鄰

宋書

沈亮字道明吳興人爲西曹主簿民有盜發冢者罪所近村民與符伍遭劫不赴救同坐亮議曰尋發冢之情事止竊盜徒以侵亡犯死故同之嚴科夫穿掘之侶必銜枚以晦其迹劫掠之黨必謹呼以威其事故赴凶赫者易應潛密者難且山原爲無人之鄉邱壟非恒塗所踐至於防救不得比之村郭督實效名理與劫異則符伍之坐居宜降

矣又結罰之科雖有同符伍之限而無遠近之斷夫冢無  
村界當以比近坐之若不域之以界則數步之內與十里  
之外便應同罹其責防民之禁不可頓去止非之憲宜當  
其律愚謂相去百步同赴告不時者一歲刑自此以外差  
不及罰

開門疑賊

梁書

先是武帝使劉坦爲湘州刺史時東昏遣劉希祖破西臺  
所選太守范僧簡於平都傳檄湘郡於是始興內史王僧  
粲應之州人咸欲汎舟逃走坦悉聚船焚之前湘州鎮軍  
鍾元紹潛應僧粲坦聞其謀僞爲不知因理訟至夜城門

遂不閉以疑之元紹未及發明旦詣坦問故坦久留與語  
密遣親兵收其家元紹在坐而收兵已報具得其文書本  
末元紹卽首伏於坐斬之焚其文書餘黨悉無所問

測囚時刻

陳書

范泉刪定律令以舊法測囚起自晡鼓盡於二更非人所  
堪官分其刻數日再上周宏正議曰測人時節本非古制  
近代已來方有此法起自晡鼓迄於二更豈是常人所能  
堪忍所以重械之下危墮之上無人不屈誣枉者多朝晚  
二時同等刻數進退而求於事爲衷若謂小促前期致罪  
不伏如復時節延長則無愆妄款且人之所堪既有彊弱

人之立意固亦多途至如貫高榜笞刺爇身無完膚戴就  
熏鍼並極困篤不移豈關時刻長短掠測優劣夫與殺不  
辜甯失不經罪疑惟輕古聖垂法愚謂依范泉著制爲允  
沈洙議曰夜中測立緩急易欺兼用晝漏於事爲允愚意  
願去夜測之味從晝漏之明斟酌古今之間參會二漏之  
義捨秋冬之少刻從夏日之長晷不問寒暑並依今之夏  
至朝夕上測各十七刻比之古漏則上多昔四刻卽用今  
漏則冬至多五刻雖冬至之時數刻侵夜正是少日於事  
無疑庶罪人不以漏短而爲捍獄囚無以在夜而致誣宜  
依范泉前制

察訪民瘼

魏書

宋世景廣平人爲滎陽太守濟州刺史鄭尙弟遠慶先爲苑陵令多所受納百姓患之世景下車召而誠之曰與卿親宜假借吾未至之前一不相問今日之後終不相捨而遠慶自若世景繩之以法遠慶棄官亡走於是屬縣畏服終日坐於廳事吏民見者皆假之恩顏屏人密語民間之事巨細必知發奸擿伏有若神明嘗有一吏休滿還郡食人雞豚又有一幹受人一帽又食二雞世景叱之曰汝何敢食甲乙雞豚取丙丁之帽吏幹叩頭伏罪

諫逋亡連坐

魏書



崔挺字雙根博陵安平人爲光州刺史風化大行魏主以有罪徙邊者多逋亡乃制一人逋亡闔門充役挺諫曰周書父子兄弟罪不相及天下善人少惡人多若一人有罪延及闔門則司馬牛受桓魋之罰柳下惠嬰盜跖之誅豈不哀哉魏主從之

知謗訕誣

魏書

許宗之高陽新城人也爲定州刺史求取不節以州民馬超謗已毆殺之恐其家人告狀上超詆訕朝政魏主曰此必誣也朕爲天下主何惡於超而有此言必宗之懼罪誣超案驗果然遂斬之

賜牛息爭

魏書

張長年上谷沮陽人衮族孫也爲汝南太守有郡民劉宗之兄弟分析家貧惟有一牛爭之不決訟於郡庭長年懷然曰汝曹當以一牛故致此競脫有二牛各應得一豈有訟理卽以家牛一頭賜之於是郡境之中各相誠約咸敦敬讓

不私親故

魏書

魏詔車騎大將軍源懷行北邊時后父于勁勢傾朝野勁兄于祚與懷宿昔通婚時爲沃野鎮將頗有受納懷將入鎮祚郊迎道左懷不與語卽劾祚免官懷朔鎮將元尼須

與懷舊交貪穢狼藉置酒謂懷曰命之長短繫卿之口懷  
曰今日源懷與故人飲酒非鞫獄之所也明日公庭始爲  
使者檢鎮將罪狀之處耳竟按抵罪

力止妄殺

魏書

魏張白澤爲雍州刺史懷州民伊祁苟初三十餘人謀反  
將殺刺史馮熙討滅之文明太后欲盡誅一城之民白澤  
諫曰周書父子兄弟罪不相及今羣凶肆虐輶裂誅盡合  
城無辜奈何極辟不誣十室而況一州或有忠焉或有仁  
者若淫刑濫及殺忠與仁斯乃西伯所以歎息於九侯孔  
子所以回輪於河上伏惟聖德昭明殷鑒水鏡前禮止迅

烈之怒抑雷霆之威則溥天知幸矣太后從之

露坐聽訟

隋書

辛公義隴西狄道人爲岷州刺史下車先至獄中露坐驗問決遣咸盡還領新訟事皆立決有須禁者公義卽宿廳事終不還閤或諫曰公事有程何自苦公義曰刺史無德不能使民無訟豈可禁人在獄而安寢於家乎罪人聞之感自款服後有訟者鄉閭父老遽曉之曰此小事何忍勤勞使君訟者多兩讓而止土俗畏病若一人有疾卽合家避之父子夫妻不相看養由是病者多死公義欲變其俗因分遣官人巡檢部內凡有疾病皆以牀輿來安置廳事

暑月疫時病人或至數百公義親設一榻獨坐其間終日連夕對之理事所得秩俸盡用市藥爲迎醫療之躬勸其飲食於是悉差方召其親戚而諭之曰死生有命不關相着前汝棄之所以死耳今我聚病者坐卧其間若言相染那得不死諸病家子孫慚謝而去

去流囚鎖

隋書

王伽河間章武人爲齊州參軍被州使送流囚李參等七十餘人詣京師行至滎陽謂曰卿輩自犯國刑身嬰縲紲固其職也然伽鎖亦大辛苦吾欲與汝等脫去行至京師總集能不違期不皆拜謝曰必不敢違伽乃悉脫其伽鎖

與約曰某日當至京師如致前卻吾當爲汝受死遂捨之而去流人感悅如期而至帝聞驚異召見與語稱善久之於是悉召流人赦之詔曰使臣盡王伽民皆李參刑厝其何遠哉乃擢伽爲雍令

據律擬徒

隋書

源師字踐言西平樂都人官大理少卿帝在顯仁宮敕宮外衛士不得輒離所守有一主帥私令衛士出外帝付大理繩之師據律奏徒帝令斬之師曰此人罪誠難恕若陛下初便殺之自可不關文墨旣付有司義歸恆典脫宿衛近侍者更有此犯何以加之帝乃止

陷人非德

唐書

上患吏多受賕密使左右試賂之有司門令史受絹一匹上欲殺之民部尙書裴矩諫曰爲吏受賂罪誠當死但陛下使人遺之而受乃陷人於法也恐非所謂道之以德齊之以禮上悅告羣臣曰裴矩能當官力爭不爲面從儻每事皆然何憂不治矩年八十餘精明不忘多識故事見重於時

徑釋罪囚

唐書

魏徵從李密來京師隱太子引爲洗馬徵見秦王功高陰勸太子早爲計太子敗王責之曰爾聞吾兄弟奈何徵曰

太子早從徵言不死今日之禍王器其直無恨意拜諫議大夫封鉅鹿縣男當是時建成元吉之黨亡在民間雖更赦令猶不自安乃遣徵宣慰山東徵至磁州遇州縣錮送前太子千牛李志安齊王護軍李思行詣京師徵曰前已赦不問今復送思行等則誰不自疑雖遣使者人誰信之吾不可以顧身嫌不爲國慮且旣蒙國士之遇敢不以國士報之乎遂皆縱之

法守大信

唐書

初戴胄爲隋越王侗守虎牢秦王攻拔之引爲府士曹參軍後大理少卿缺太宗曰大理人命所繫胄清直其人哉



卽日命胄上以選人多詐冒資蔭敕令自首不首者死未  
幾有詐冒事覺者上欲殺之胄奏據法應流上怒曰卿欲  
守法而使朕失信乎對曰敕者出於一時之喜怒法者國  
家所以布大信於天下也陛下忍選人之多詐故欲殺之  
旣而知其不可復斷之以法此乃忍小忿而存大信也上  
曰卿能執法朕復何憂

止坐魁首

唐書

崔仁師定州安喜人爲殿中侍御史青州有謀反者逮捕  
滿獄詔仁師等覆按之仁師至止坐其魁首十餘人孫伏  
伽曰足下平反者多恐人情貪生見其徒侶得免未肯甘

心耳仁師曰凡治獄當以仁恕爲本豈可自規免罪知其  
寃而不爲伸邪及敕使至更訊諸囚皆曰崔公平恕無枉  
無一人異辭者

罵官杖殺

彭大翼 山堂肆考

劉仁軌汴州尉氏人爲陳倉尉部人有折衝都尉魯甯者  
暴縱無禮厯政莫能禁止仁軌特加誠喻期不可再犯而  
甯暴橫益甚後坐事繫獄甯自恃高班慢罵仁軌仁軌杖  
殺之州司以聞上怒曰是何縣尉輒殺吾折衝追至長安  
將面詰而斬之仁軌曰魯甯乃臣百姓辱臣如此臣實忿  
而殺之辭色自若魏徵侍側曰陛下知隋之所以亡乎上

曰何也徵曰隋末百姓彊暴陵辱官吏多如魯甯之比隋以是亡上乃更擢仁軌爲櫟陽丞後歷文昌左相薨於位

支黨非首

唐書

時法官競爲深酷惟司刑丞徐有功杜景佺獨存平恕被告者皆曰遇來候必死遇徐杜必生初爲蒲州司法不施敲朴吏相約有犯徐司法杖者眾共斥之迨官滿不杖一人時博州刺史琅邪王沖責息錢於貴鄉遣家奴督斂與尉顏餘慶相聞知奴自市弓矢還會沖坐逆誅魏州人告餘慶豫沖謀太后令俊臣鞠治以反狀聞有司議餘慶更永昌赦法當流侍御史魏元忠謂餘慶爲沖督償通書合

謀明甚非曰支黨請殊死籍其家詔可有功曰永昌赦令與虺貞同惡魁首已伏誅支黨未發者原之書曰殲厥渠魁律以造意爲首尋赦已伏誅語則魁首無遺餘慶赦後被言是謂支黨今以支爲首是以生入死赦而復罪不如勿赦生而復殺不如勿生竊謂朝廷不當耳太后怒曰何謂魁首答曰魁者大帥首者元謀太后曰餘慶安得不爲魁首答曰若魁首者虺貞是已旣已伏誅餘慶今方論罪非支黨而何太后意解乃曰公更思之遂免死

別病卒罪

唐書

太子宏高宗第五子也仁孝謙謹上甚愛之中外屬心有

司以征遼士亡命及亡命不及首者身殊死家屬沒官宏諫以爲士遇病不及期或被畧若溺壓死而軍法不因戰亡則同隊悉坐法家曰亡命而家屬與真亡者同沒傳曰與殺不辜甯失不經臣請條別其科無使淪胥詔可

餞飲非反

唐書

馬懷素字惟白潤州丹徒人擢監察御史魏元忠謫嶺表崔貞慎獨孤禪之等餞於郊外張易之使人上急變告貞慎等與元忠謀反太后詔懷素按之使者促迫諷令構成其罪懷素執不從太后怒召而詰之懷素對曰貞慎餞流人當得罪以爲謀反則非昔彭越以逆誅樂布奏事越頭

下漢不坐罪今元忠罪非越比不宜坐餞闕之人且陛下操生殺柄欲加之罪自當處決聖心旣付臣按狀惟知守陛下法耳太后意解貞慎等乃免

輕罪勿重

唐書

李乾祐雍州長安人爲殿中侍御史郇令裴仁軌私役門夫上怒欲斬之乾祐諫曰法者陛下所與天下共也今仁軌坐輕罪而抵極刑臣恐人無所措手足矣上悅從之

判逆臣子

唐書

楊昉戶部尙書纂子也官肅機時有字文化及子訴治先陰昉未食未卽判遽曰肅機而未食庸知天下有冤而求

食平昉怒取牒署曰父殺隋主子訴隋資可乎人服其敏

失出過小

唐書

徐有功名宏敏以字行官司刑少卿潤州刺史竇孝誾妻  
龐氏爲奴誣告云夜解祈福則天令給事中薛季昶鞠之  
季昶鍛練成其罪龐氏當坐斬有功論之以爲無罪季昶  
奏有功阿黨惡逆罪當絞令史以白有功有功歎曰豈我  
獨死諸人永不死邪旣食掩扉熟寢太后召有功謂曰卿  
比按獄失出何多對曰失出人臣之小過好生聖人之大  
德太后默然龐得減死有功免爲民未幾起拜左司郎中  
嘗謂所親曰大理人命所繫不可阿旨詭辭以求苟免故

有功爲獄常持平守正以執據冤罔凡三坐大辟將死泰  
然不憂赦之亦不喜后以此重之

判重南山

唐書

李元絃字大綱京兆萬年人爲雍州司戶參軍時太平公  
主與寺僧爭碾磴元絃判歸僧寺長史竇從一懼命改判  
元絃大署判後曰南山可移此判無動從一不能奪

刑期遠大

唐書

賈至字幼鄰河南洛陽人歷中書舍人至德中將軍王去  
榮以私怨殺本縣令當死上以其善用礮敕免死以白衣  
詣陝郡效力至上表曰去榮無狀殺本縣之君而陛下以



礮石一能免其殊死今諸軍技藝絕倫者甚眾必恃其能所在犯上復何以止之若止捨去榮而誅其餘者則是法令不一而誘人觸罪也今惜一去榮之材而不殺必殺十如去榮之材者其傷不亦多乎夫去榮逆亂之人也焉有逆於此而順於彼悖於縣君而不悖於大君歟伏維明主全其遠者大者

乞取贓輕

唐書

河南尹李朝隱政甚清嚴豪右屏跡時太子舅趙常奴恃勢侵害平人朝隱曰此而不繩何以爲政執而杖之遷大理卿時武強令裴景仙犯乞取贓積五千匹事發逃走上

大怒令集眾殺之朝隱執奏曰有斷自天處之極法生殺之柄人主合專輕重有條臣下當守枉法者枉理而取十五疋便抵死刑乞取者因乞爲贓數千匹止當坐流今若乞取得罪便處斬刑後有枉法當科欲加何辟所以爲國惜法期守律文非敢以法隨人曲矜仙命射兔魏苑驚馬漢橋初震皇赫竟從廷議豈威不能制而法貴有常又景仙曾祖寂草昧忠節定爲元勳位至台司恩倍常數載初之際被枉破家諸子各犯非辜唯仙今見承嫡若寂勳都棄仙罪特加則叔向之賢何足稱者若敖之鬼不其餒而捨罪念功乞垂天聽應敕決杖詔決杖一百流嶺南惡處

嚴治吏卒

唐書

柳公綽字寬京兆華原人累遷開州刺史地接夷落寇常逼其城吏曰兵力不能制願以右職署渠帥公綽曰若同惡邪何可撓法立誅之寇亦引去入爲京兆尹有神策小將躍馬衝其前導公綽駐馬杖殺之上怒詰之對曰京兆爲輦轂師表今視事之初而小將敢爾唐突此乃輕陛下詔命非獨慢臣也臣知杖無禮之人不知其爲神策軍將也上曰何不奏對曰臣職當杖之不當奏上退謂左右曰汝輩須作意此人朕亦畏之

誅舞文吏

唐書

柳公綽爲京兆尹時幽鎮用兵補置諸將使駟係道公綽奏曰比館遞匱乏驛置多闕敕使衣緋紫者所乘至三四十騎黃綠者不下十數吏不得視券隨口輒供驛馬盡乃掠奪民馬怨嗟驚擾行李殆絕請著定限以息其弊有詔中書條檢定數由是吏得紓罪改山南東道節度使行部至鄧縣有二吏一犯賊一舞文眾謂公綽必殺犯賊者公綽判曰賊吏犯法法在姦吏亂法法亡竟誅舞文者公綽馬害圍人命斬之賓客進言曰可惜良馬圍人自防不至耳公綽曰安有馬良害人者乎亟命殺之

殺壞器卒

唐書

郭子儀以副元帥居蒲子晞以檢校尙書領行營節度使屯邠州士卒暴橫節度使白孝德不敢劾段秀實時爲涇州刺史適至請治之俄而晞士十七人入市取酒刺酒翁壞釀器秀實列卒取其首注漿上植市門晞一營大譟盡甲秀實選老嫗者一人馳馬至晞門甲者出秀實笑且入曰殺一老卒何甲也吾戴吾頭來矣甲者愕貽因曉之曰尙書固負若屬邪副元帥固負若屬邪奈何欲以亂敗郭氏晞出秀實讓之曰副元帥勦塞天地當念始終今常侍恣卒爲暴行且致亂亂則罪及副元帥郭氏功名其存者幾何言未畢晞再拜曰公幸教晞以道敢不從命卽叱左

右皆解甲令曰敢讎者死秀實曰吾未哺食請設具已食  
曰吾疾作願宿門下遂卧軍中晞大駭戒候卒擊柝衛之  
旦與俱至孝德所謝不能邪由是安馬璘奏加開府儀同  
三司軍中有能引二十四弓而犯盜者璘欲免之秀實曰  
將有私愛則法令不一雖韓白復生亦不能爲理璘善其  
議竟使殺之

內侍蔭子

唐書

李中敏爲理匭使建言上書者將納於匭有司先審其副  
有不可輒卻之臣謂本置匭函每日從內將出日暮進入  
爲下開必達之路廣聰明直枉結若有司先裁可否恐事

不重密非窮塞得自申意請一裁諸上詔可遷給事中內  
謁者監仇士良請以開府蔭其子中敏判云開府階誠宜  
蔭子謁者監何由有兒士良慙恚李德裕亦以中敏爲楊  
嗣復之黨惡之出爲刺史

議叛婦罪

唐書

劉三復潤州句容人爲刑部侍郎朝廷用兵誅劉稹澤潞  
旣平朝議以劉從諫妻裴氏是裴問之妹欲原之法司定  
罪以劉稹之叛裴以酒食會潞州將校妻女泣告以固逆  
謀三復奏曰自古人臣叛逆合有三族之誅則阿裴已不  
得免於極法矣又況從諫死後主張逆謀稹年旣幼裴爲

母氏固宜誠誘若廣說忠孝之道深陳禍福之源必冀虺  
毒不施梟音全革而乃激厲凶黨膠固叛心廣招將校之  
妻適有酒食之宴號哭激其眾意贈遺結其羣情遂使叛  
黨稽延周歲方就誅夷此阿裴之罪也雖以裴問之功或  
希減等而國家有法難議從輕伏以管叔周公之親弟也  
有罪而且誅之況裴問之功效安能破朝廷法邪阿裴請  
準法從之

杖弄權僧

唐書

薛存誠字資明河中寶鼎人官御史中丞僧鑒虛自貞元  
以來以財交權倖受方鎮賂遺厚自奉養吏不敢詰及坐



折獄龜鑑補

卷五

刑獄上

于頔事上欲釋之存誠不可上遣中使詣臺宣旨存誠對曰陛下必欲釋此僧請先殺臣不然臣不奉詔上嘉而從之杖殺鑒虛

杖抗債軍

唐書

左神策軍吏李昱貸長安富人錢不償京兆尹許孟容收捕械繫立期使償日期滿不足當死中尉訴於上上遣中使宣旨送本軍孟容曰臣不奉詔當死然臣爲陛下尹京畿非抑制豪強何以肅清輦下錢未償李昱不可得上嘉其剛直而許之自興元已後禁軍有功又中貴之尤有渥恩者方得護軍故軍士日益縱橫府縣不能制孟容剛正

不懼以法繩之一軍盡驚

杖無禮將

唐書

辭元賞不知何許人爲京兆尹嘗詣李石第聞石方坐聽事與一人爭辨甚喧元賞使覘之云有神策軍將訴事元賞趨入責石曰相公紀綱四海不能制一軍將使無禮如此何以鎮服四夷卽令左右擒出仇士良召之元賞曰屬有公事行當至矣乃杖殺之而白服以見士良曰中尉宰相皆大臣也宰相之人若無禮於中尉如之何中尉之人無禮於宰相庸可恕乎中尉與國同體當爲國惜法元賞已囚服而來惟中尉死生之士良無可如何乃呼酒與元

賞歡飲而罷

釋久繫囚

唐書

唐扶字雲翔并州晉陽人官山南道宣撫使至鄧州奏內鄉縣行市黃潤兩場倉督鄧琬等先主掌河南江西運到糙米至浙川縣於荒野中囤儲除支用外六千九百四十五碩裒爛成灰塵度支牒徵元掌所由自真元二十年鄧琬父子兄弟至元孫相承禁繫二十八年前後禁死九人今琬孫及元孫見在枷禁者敕曰如聞鹽鐵度支兩使此類極多其鄧琬等四人資產全已賣納禁繫三代瘐死獄中實傷和氣鄧琬等並疏放天下州府監院如有此類不

得禁經三年已上速便疏理以聞物議嘉扶有宣撫之才

催積年賦

唐書

李頻字德新睦州壽昌人擢武功令於時畿民多籍神策軍吏以其橫類假借不敢繩以法頻至有神策士尙君慶通賦六年不送睥然出入閭里頻密撻比伍與競君慶叩縣廷質頻卽械送獄盡條宿惡請於尹殺之督所負無少貸豪猾大驚屏息奉法縣大治有六門堰者厥廢百五十年方歲饑頻發官廩庸民浚渠按故道廝水溉田穀以大稔擢侍御史

雪冤揮金

唐書

初高仁厚擒阡能乃之陳敬瑄榜邛州賊黨皆釋不問未幾邛州刺史申捕獲阡能叔父行全家請準法敬瑄以問孔目官唐溪對曰公已榜勿問而刺史復問之此必有故今若殺之豈惟使明公失大信竊恐阡能之黨紛紛復起矣敬瑄從之因推其故果行全有良田刺史欲買之不與陷之耳他日密餉溪金五百溪怒曰此乃太師仁明何預吾事汝乃懷禍相餽乎還其金斥逐使去

下手爲從

五代史

崔沂字德潤爲御史司憲糾繆繩違不避豪右寇彥卿入朝有民不避道投諸欄外而死沂劾奏請論如法彥卿對

令從者舉置欄外不意誤死梁主欲以過失論歸罪從者  
沂奏在法以勢力使令爲首下手爲從不得歸罪從者不  
鬪而故毆傷人加傷罪一等不得爲過失乃責授彥卿遊  
擊將軍彥卿揚言有得崔沂首者賞萬緡梁主使人謂彥  
卿曰崔沂有毫髮傷我當族汝時功臣驕橫由是稍肅

### 改敕救人

五代史

張居翰字德卿唐掖廷令張從政之養子爲樞密使魏王  
破蜀王衍朝京師行至秦州而明宗軍變於魏莊宗東征  
景進等言王衍族黨不少恐其爲變莊宗乃遣中使齎敕  
往誅之敕曰王衍一行並從殺戮已印畫居翰覆視就殿

柱指去行字改爲家字由是獲免者千餘人

### 將卒互殺

五代史

白奉進字德昇雲州清塞軍人晉高祖時充護聖左廂都指揮使范延光據鄴爲亂詔遣率騎軍三千北屯滑臺時符彥饒爲滑州節度使一夕有軍士夜掠居人奉進捕之凡獲五盜三在奉進本軍二在彥饒麾下尋命俱斬之彥饒怒其不先告深銜之明日奉進從騎數人候彥饒於牙城旣入且述其過彥饒曰軍中法令各有部分何得將滑州兵士一例處斬殊無主客之義乎奉進曰軍士抵法安有彼我今僕以咎自陳而公怒不息莫是與范延光同反

邪因拂衣而起彥饒不留其帳下介士大譟擒奉進殺之  
盧順密汝陽人范延光據鄴城叛高祖命諸將討之順密  
亦豫其行時符彥饒軍士夜掠白奉進斬之彥饒軍士殺  
奉進譟譟不止左廂指揮使馬萬欲從亂遇順密帥部兵  
出營厲聲謂萬曰符公擅殺白公必與魏城通謀此去行  
宮纔二百里奈何不思報國乃欲助亂自求族滅乎奉進  
見殺過在彥饒擒送天子必立大功順我者賞之不順我  
者殺之萬曰善萬部兵尙有呼躍者順密殺數人眾莫敢  
動乃執彥饒送大梁斬之

放叫譟生

五代史



史德琬中書令宏肇子也乾祐中授檢校司空領忠州刺史粗讀書親儒者嘗不悅父之所爲貢院嘗錄一學科於省門叫譟申中書門下宰相蘇逢吉令送侍衛司請痛笞刺面德琬聞之白父曰書生無禮有府縣御史臺非軍務治也公卿如此蓋欲彰大人之過宏肇深以爲然卽破械放之後之識者尤嘉德琬之爲人焉

貸誤殺罪

陸游  
南唐書

南唐宰相馮延巳晚稍自厲爲平恕蕭儼嘗廷斥其罪及儼爲大理卿斷軍使李申妻獄失入坐死議者皆以爲當死延巳獨揚言曰儼爲正卿誤殺一婦人卽當以死君等

今議殺正卿他日孰任其責乃建議儼素有直聲今所坐已更赦宥宜加宏貸儼遂免人士尤稱之

枉殺有罰

五代史

唐明宗詔曰朕聞堯舜有恤刑之典貴務好生禹湯申罪已之言庶民知過今月十七日據巡檢軍使渾公兒口奏稱有百姓二人以竹竿習戰鬪之事朕初聞奏報實所不容率爾傳宣令付石敬瑭處置今旦安重誨敷奏方知悉是幼童爲戲載聆讜議方覺失刑亦以渾公兒誑誣頗甚石敬瑭詳覆稍乖致人枉法而殂處朕有過之地今減常膳十日以謝幽冤其石敬瑭可罰一月俸渾公兒決脊杖

二十仍銷在身職銜配流登州小兒骨肉賜絹五十匹粟麥各百石便令如法埋葬

殺馬視粟

五代史

閔帝卽位加石敬瑭中書令及增食邑敬瑭性簡儉未嘗以聲色滋味輒自燕樂每公退必召幕客論民間利害及病政得失明而難犯事多親決有店婦與軍士訟云曝粟於門爲馬所食而軍士懇訴無以自明敬瑭謂鞠吏曰兩訟未分何以爲斷可殺馬剝腸而視其粟有則軍士誅無則婦人死遂殺馬馬腸無粟因戮其婦人境內肅然三月移鎮常山所歷方鎮以孝治爲急見民間父母在昆弟分

索者必繩而殺之勤於吏事廷無滯訟

截足事佛

玉堂閒話

蜀將王宗傳帥南梁日聚糧屯師日興工役鑿山刊木畧不暫停運粟泛舟軍人告倦岷峨之人酷好釋氏軍中皆右執凶器左秉佛書誦習之聲混於刁斗時有健卒李延召力竭形枯不任其事遂設詐陳狀云近者得見諸佛如來乘輿跨象出入巖崖之中今乞蠲兵事截足事佛俾將來希證無上之果宗傳判曰雖居兵籍心在佛門修心於行伍之間達理於幻泡之外歸心而依佛氏截足以事空王壯哉豺獠何太猛利大願難阻真誠可嘉準狀付本軍

除落名氏仍差虞候監截一足訖送真元寺收管灑掃焚修此卒本欲以矯妄免其役及臨斷足則怖懼益切遷延十餘日哀號宛轉避其鋒鋌宗儔聞之大笑而不罪焉

牛無千斤

通鑑

胡進思字克開家於雪川從錢武穆王鏐軍中累功拜內衛統軍使及嗣王宏侔立進思恃迎立功干預政事民有殺牛者吏按之引人所市肉近千斤宏宗問進思牛大者肉幾何對曰不過三百斤宏侔曰然則吏妄也命按其罪寬邊將罪

宋史

李漢超字顯忠雲中人領齊州防禦使關南兵馬都監民

有訟其強娶已女爲妾及貸民錢不償者帝召謂曰汝女可適何人曰農家又問漢超未至關南契丹何如曰歲苦侵暴曰今復爾邪曰否帝曰漢超朕之貴臣汝女爲之妾不猶愈於爲農婦乎漢超不在關南汝家尙能保其所有貨財邪責其人而遣之密使諭漢超曰亟還其女并所貸朕姑貰汝勿復爲也不足於用何不告朕邪漢超感泣在郡十餘年有善政

細審活盜

宋 史

趙普字則平幽州人遷洛陽范質征淮南奏爲軍事判官宋太祖拔滁州待以宗分適太祖父臥病普奉藥餌昕夕

不離嘗與語悅之時獲盜百餘人皆應死普請先訊鞠然後決所活十七八益奇之

立斬妖賊

宋史

陳起蘄春人南唐舉進士爲黃梅令時有妖賊諸祐者自言能使貧者富貴者貧俚民效之積眾數百夜行晝息取資於盜起到官數日籍祐爲里長不服且嫚言曰吾取令頭殺豎子耳起聞執祐斬之由是知名遷監察御史

部校誣將

宋史

太祖將征澤潞遷郭進本州防禦使充西山巡檢以備并寇太祖每遣戍西山必戒之曰汝謹奉法我猶赦汝郭進

殺汝矣有部下軍校告其陰通太原將有異志者太祖詰之軍校辭窮復曰進御下嚴臣不勝忿怨故誣之耳太祖命執以與進令殺之會北漢來伐進語其人曰汝敢論我信有膽氣今貫汝罪汝能掩殺敵兵當卽薦汝如敗可自投河東其人踴躍赴戰大致克捷

燒草弭盜

宋史

辛仲甫字之翰汾州孝義人郭崇鎮深趙以辛仲甫爲觀察判官監軍陳思誨密奏崇有姦狀上怒且疑遣中使馳往驗之未至崇憂懣失據謂賓佐曰苟王人不察爲之奈何皆愕相視仲甫曰皇帝膺運公首効節軍民處置率循



常度且何以加辭第遣偵使者率僚屬盡郊迎禮聽彼伺察久當自辨矣崇如其言使者至視崇無他意還奏上大  
喜歸罪於思誨仲甫入拜右補闕出知彭州州卒誘營兵  
及諸屯戍謀以長春節宴集日爲亂屬春初仲甫出城巡  
視見壕中草深意可藏伏命燒薙之兇黨疑謀泄有自首  
者禽百餘人盡斬之

誣訟大臣

宋 史

謝德權字士衡福建人提點京城倉草場先是層積多患  
地下溼德權累斲爲臺以藉之遂無敗腐京城衢巷狹隘  
命德權廣之初受詔則先撤貴要邸舍羣議紛然詔止之

德權請曰臣已受命不可中止今沮事者皆權豪輩客屋  
室僦資耳非有他也上從之因條上衢巷廣袤及禁鼓昏  
曉之制有兇人劉暉僧澄雅訟執政與許州民陰搆西夏  
爲叛者詔溫仲舒謝泌鞫問令德權監之旣而按驗無狀  
翌日對便殿具奏其妄泌獨曰追攝大臣獄狀乃具德權  
曰泌欲陷大臣邪若使大臣無罪受辱則人君何以使臣  
臣下何以事君仲舒曰德權所奏甚善上乃可之

單馬諭賊

宋 史

查道字湛然歙州休甯人知果州時賊酋何彥忠集其徒  
二百餘止西充之大木槽穀弓露刃詔書招之未下咸請

發兵殄之道曰請往諭之遂微服單馬數僕間關林壑百里許直趨賊所初悉驚畏持滿外嚮道神色自若踞胡床而坐諭以詔意或識之曰郡守也嘗聞其仁是豈害我者卽相率投兵拜號呼請罪悉給券歸農驛聞璽書褒諭

力除內賊

宋 史

馬知節字子元幽州薊人也以蔭補供奉官護兵博州契丹入邊敗我師於君子館先是知節完城繕甲儲積芻粟吏民以爲生事旣而契丹果至以有備引去時部民入保避寇卒有盜婦女首飾者護軍止笞遣之知節曰民被外患而來反罹內寇此而可恕何以肅下卽命斬之徒知定

遼軍時議調河南十三州之民輸餉河北轉運使樊知古適至軍議事知節曰軍少粟多簸其紅腐當得十之六七知古從之果獲粟五十萬斛分給諸屯遂省河南之役

折服外藩

宋史

召知桂州陸詵爲天章閣待制除知延州會西夏李諒祚寇慶州以敗還聲言益發人騎且出嫚辭攻圍大順城詵謂由積習致然不稍加折諄則國威不立乃留止請時服使者及歲賜而移牒宥州問故帝喜曰固知詵能辦此諒祚聞之大沮盤旋不敢入乃報言邊吏擅興兵今誅之矣朝廷遣何次公持詔書諭告詵以爲未可明年又乞留賜

冬服及大行遺留二使而自以帥牒告之故諒祚始因詵謝罪共貢職

諭眾定亂

宋史

趙滋字子深開封人官涇原儀渭鎮戎軍都巡檢會滑州得勝砦主姚貴殺監押崔絢劫宣武神騎卒千餘人叛攻羊牧隆城滋馳至諭降八百餘人貴窮走出砦招討使令滋給賜降卒及遷補將吏滋以爲如是是誘其爲亂藏其牒不用范仲淹韓琦經畧陝西舉滋可將領得定州路駐泊都監嘗因給軍食或言粟不善滋叱之曰爾欲以是怒眾邪使眾有一言當先斬爾以徇會契丹民數違約乘小

舟漁界河中吏憚生事累歲莫敢禁後又遣大舟十餘自海口運鹽入界河朝廷患之以滋可任徙知雄州滋戒巡兵舟至輒捕其人殺之輦其舟移文還涿州漁者遂絕

諭叛黜懦

宋史

孫覽字傳師龍圖閣直學士覺弟也擢第知尉氏縣有屯卒苦其將虐謀因大閱殺之以叛覽馳往諭曰將誠無狀然已趣吏奏罪矣天子何負汝輩乃欲致滅族邪眾意遂安仁宗壯其材擢爲右司員外郎荆湖開疆命往相其便還言沅州所招溪洞百三十宜從本郡隨事要束勿建官置戍以爲民困自誠州至融江口可通西廣鹽以省北道

餉餽悉從之歷知桂廣渭三州夏人入邊檄大將苗履禦之履稱疾覽按正其罪竄房陵轅門肅然

痛抑姦吏

宋史

陳堯佐知并州每汾水暴漲民輒驚擾爲築堤植柳數萬本作柳溪民賴其利累遷樞密副使知祥符陳詒治吏嚴急空縣逃去太后怒命加詒罪時呂夷簡媮聯不決堯佐獨曰罪詒則姦吏得計後誰敢復繩者由是得免

力辨活囚

宋史

周敦頤字茂叔道州營道人爲分甯主簿有獄久不決敦頤至一訊立辨邑人驚曰老吏不如也調南安司理有囚

法當不死轉運使王逵欲深治之敦頤力與辨逵不聽敦  
頤委手板將棄官去曰如此尚可仕乎殺人以媚人吾不  
爲也逵悟因得免徙知南昌南昌人皆曰是能辨分甯獄  
者吾屬得所訴矣富家大姓黠吏惡少惴惴焉不獨以得  
罪於令爲憂而又以污穢善政爲恥

### 止誅叛首

宋史

呂居簡宰相夷簡弟也提點京東刑獄時夏竦有憾於石  
介介死竦言於上曰介未嘗死北走鄰國矣乃遣中使發  
棺驗之居簡謂曰萬一介果死則朝廷爲無故發人之墓  
奈何中使曰於君如何居簡曰介死當時必有內外親族



及門生會葬問之可也中使乃令結狀保證以聞介事乃  
白徐州妖人孔直溫挾左道誘軍士爲變或詣轉運使告  
不受詞居簡令易其牒盡捕究黨與貸註誤者請於朝斬  
直溫等濮州復叛都民驚潰居簡馳往獲首惡誅之因大  
閱兵享勞姦不得發用二事遷龍圖閣直學士知廣州

### 收挾持吏

宋 史

趙概字叔平南京虞城人登進士知洪州州有歸化卒皆  
故時羣盜適僚吏鄭陶饒吏挾持郡事造飛語言官廩陳  
惡卒有怨言槩不答會有自容州逃戍而歸更犯法者斬  
之以徇因收陶爽抵罪闔府股栗

治權剽盜

宋史

曾鞏字子固建昌南豐人通判越州州舊取酒場錢給募  
牙前錢不足賦諸鄉戶期七年止期盡募者志於多入猶  
責賦如初鞏訪得其狀立罷之歲饑度常平不足贍而田  
野之民不能皆至城邑諭告屬縣諷富人自實粟總十五  
萬石視常平價稍增以予民民得從便受粟不出田里而  
食有餘轉知齊州以疾奸息盜爲本曲堤周氏子高賊良  
民汙婦女奢僭服器縱橫里中章邱民聚黨號霸王社椎  
剽村落鞏悉寘於法

弭鄰封盜

宋史

劉永年字君錫并人爲永興軍路總管契丹遣使來請帝  
繪像選副張昇報使契丹以未得志夜取巨石塞驛門眾  
皆恐永年素有力手擲棄之契丹驚以爲神遷知代州契  
丹取西山木積十餘里輦載相屬於路前守不敢遏永年  
遣人焚之一夕盡上其事帝稱善契丹移檄捕縱火盜永  
年曰盜固有罪然發在我境何預汝事乃不敢復言

除害民僧

宋 史

歐陽載字則之廣陵人知泗州先是京師歲旱有浮圖人  
斷臂禱雨官爲起寺於龜山其勢傾動四方又誘民男女  
投淮水死曰佛之法用此得大利而愚民歲死淮水者幾

百人臨溺時用其徒倡呼前後擁之以入至有自悔欲走者呼號不得免載聞之驚曰害有大於此邪盡捕其徒詰其姦民誅數人遣還鄉里者數百人遂毀其寺

赦斬卒將

宋史

尹源字子漸河南人通判涇州時知滄州劉渙坐專斬卒降知密州源上言渙爲主將部卒有罪不伏笞輒呼萬歲渙斬之不爲過以此謫渙臣恐邊兵愈驕輕視主將所繫非輕渙遂獲免

釋失教生

宋史

王獵字得之長垣人爲永興藍田主簿府使之掌學諸生

有犯法者獵自責數以爲教之不至屏出之府帥捕生下  
獄獵前白曰此特年少不率教爾致於理不足以益美化  
恐適貽士類辱帥悟而喜曰吾慮初不及此卽釋生而待  
獵加敬徙爲林慮令縣依山俗以蒐田爲生不知學獵立  
孔子廟擇秀民誨之居官無絲髮擾吏民愛信共目爲清  
長官

懲不法吏

宋 史

楊紘字望之禮部尙書億之從子也歷荆南福建轉運按  
察使江東饑紘開義倉賑之吏持不可紘曰義倉爲民也  
稍稽人將殍矣紘御下急常曰不法之人不可貸去之止

不利一家爾豈可使郡千萬家俱受害邪聞者望風解去  
或過期不敢之官

諭眾勿亂

宋史

竇卞字彥法曹州冤句人舉進士第通判汝州秦悼王葬  
汝宗室來附者眾得兵五千郡守林濰以汝與其鄉近因  
使輦薪芻鐵石致其家眾怒憤謀殺濰會日暮門閉不果  
遂挾大校叛卞啟關招諭之曰汝曹特醉酒狂呼爾毋恐  
眾小定乃密推首惡羈之請於朝詔濰致仕悉配徙亂者  
擢知深州河決滹沱水及郡城流民自恩冀來踵相接卞  
發常平粟食之吏白擅發且獲罪卞曰俟請而得報民死

矣吾甯以一身活數萬人尋以請詔許之

諭思歸叛卒

宋史

呂公孺字稚卿公弼弟也歷知永興軍徙河陽洛口兵千人以久役思歸奮斧鉞排關不得入西走河橋觀聽洶洶諸將請出兵掩擊公孺曰此皆亡命急之變且生卽乘馬東去遣牙兵數人迎諭之曰汝輩誠勞苦然豈得擅還一度橋則罪不赦矣太守在此願自首者止道左皆靜立以俟公孺索倡首者黥一人餘復送役所語其校曰若復偃蹇者斬而後報眾帖息乃自劾專命詔釋之累遷刑部侍郎知開封府爲政明恕原廟亡珠繫治典吏久公孺曰主

者番代不一曷嘗以珠數相授受歲時諱日宮嬪狎至奈何專指吏卒乎請之得釋擢戶部尙書

### 追斬叛卒

宋史

林廣萊州人授內殿崇班從環慶蔡挺麾下嘗護中使臨邊將及烏雞川遽率眾循山行道遇熟羌以險告廣不答夏人果伏兵於川計不行而去告者乃謀也韓絳奏爲本道將慶兵據北城叛廣在南城望其眾進退不一曰是不舉軍亂也挺身縋城出其後諭以逆順皆投兵聽命出者才三百人廣語餘眾曰亂者去矣汝曹事我久能聽命不唯得活仍有功得百餘人激厲要束使反攻城下兵禽戮



皆盡遂平北城出追亂者至石門山諭之不肯降縱兵尾擊始請命廣曰不從吾言今窘而就死非降也悉斬之

焚神杖巫

宋史

上官均字彥衡邵武人爲監察御史裏行時相州富人子殺人讞獄爲審刑大理所疑京師流言法官竇莘等受賄蔡確引猜險吏數十人窮治莘等慘酷無敢明其冤均上疏言之乞以獄事詔臣參治坐是謫知光澤縣莘等卒無罪天下服其持平有巫託鬼神能禍福人致貲甚富均焚像杖巫出諸境

滅妖黨罪

宋史

盧士宏字子高新鄭人知信陽軍官捕爲妖術者餘黨懼  
及羣聚山谷間士宏請減其罪招之卽相帥歸命徙知漢  
州校實民產使力役不濫人德之又知洋州先是圭田多  
虛籍士宏考校令隨實以輸自部使者而下皆十損七八  
文彥博包拯以廉能薦由三司開拆司擢夔州路轉運使  
遂知廣州或傳安南舟數百泊海中將爲寇嶺徼驚揺士  
宏灼其非是日從賓客宴游爲樂民賴以安

徐誅悍卒

增智囊補

蘇軾通判密郡有盜發而未獲安撫使遣三班使臣領悍  
卒數十人入境捕之卒兇暴恣行以禁物誣民強入其家

爭鬪至殺人畏罪驚散民訴於軾軾投其書不視曰必不  
至此悍卒聞之頗用自安軾徐使人招出戮之遇事須有  
此鎮定力量然識不到則力不足

先散叛黨

增智囊補

薛長孺爲漢州通判戎卒閉營門放火殺人謀殺知州兵  
馬監押有來告者知州監押皆不敢出長孺挺身出營諭  
之曰汝輩皆有父母妻子何故作此事然不與謀者各在  
一邊於是不敢動惟本謀者八人突門而出散於諸縣村  
野捕獲時謂非長孺則一城之人塗炭矣

自枯求神

增智囊補

黃震通判廣德州廣德俗有自嬰桎梏自拷掠而以徼福於神者震見一人召問之乃兵也卽令自狀其罪卒曰無有也震曰爾罪必多但不敢對人言故告神求免耳杖而逐之此風遂絕

痛抑頑民

宋 史

朱輅字國器桂陽縣人通判邵州統制長倩殺江華叛蠻降者百餘人以首級分贖將士又舉人唐貢引叛蠻至戮錦田一千三百餘家民因叛蠻羣起爲盜兩獄株連千人潭帥檄輅往推治輅留三十八人餘悉保釋擢知邵州有私酤家率同惡人擊尉傷足輅勘獄具而遇赦輅曰承平

日久頑民強橫不可長復收繫以聞詔令刺配河北

擢帥安兵

宋史

張旻字元弼開封人授西頭供奉官契丹圍望都旻與諸將從間道往援比至城已陷矣旻與敵戰身被數創殺契丹梟將召還入對帝曰卿嘗請北伐契丹入塞與卿所請興師之日同悔不用卿策今領守澶州而未得人如何旻請行帝喜命爲馬軍副都指揮使被旨選兵下令太峻兵懼謀欲爲變上召二府議之王旦曰若罪旻則自今帥臣何以御眾捕謀者則震驚都邑今但擢旻使解兵柄反側者當自安矣帝從其言兵果無他帝語左右曰王旦善處

大事真宰相也

主帥宜重

宋史

張詠字復之濮州鄆城人知崇陽縣勸民拔茶植桑後榷茶法行崇陽民獨安其利太宗聞其強幹超拜樞密直學士同知通進銀臺封駁司張永德爲并代部署有小校犯法笞之至死詔案其罪詠封還詔書且言陛下方委永德邊任若以一部校故摧辱主帥臣恐下有輕上之心太宗不從未幾果有營兵脅訴軍校者詠引前事爲言太宗改容勞之蜀賊張餘復盛乃以詠知益州詠至王繼恩上官正擁兵玩寇不進部下復剽民財詠不欲失歡以言激正

勉其親行仍盛爲供帳餞之舉酒屬軍校曰爾曹蒙國家厚恩此行當平蕩醜類若老師曠日卽此地還爲爾死所矣正由是決行深入大致克捷時寇掠之際民多脇從詠諭以恩信使各歸田里

請除非刑

宋 史

刁衍字元賓昇州人知睦州桐廬縣會詔羣臣言事衍上諫刑書曰刑人於市與眾棄之則知黃屋紫宸之中非用刑行法之處望自今御前不行決罰之刑殿前引見司鉗黥法具並赴御史臺敕杖不拘大小皆赴廷尉以重聖皇明慎刑罰之至意或有犯劫盜亡命罪重者則足釘身國

門布令亦望減除其法如此則人情不駭各固其生和氣無傷必臻上瑞再遷大理寺丞

寬殺牛罰

宋史

張逸字大隱鄭州滎陽人歷樞密直學士知益州華陽騶長殺人誣道旁行者縣吏受財獄旣具乃使殺人者守囚逸曰囚色冤守者氣不直豈守者殺人乎囚始敢言而守者果服立誅之蜀人以爲神初民饑多殺耕牛食之犯者皆配關中逸奏民殺牛以活將死之命與盜殺者異若不禁之又將廢穡事今歲少稔請一切放還復業報可

卻金籍穀

宋史



歐陽晧字日華廬陵人爲隨州推官治獄之難決者三十  
六人奇峯寺僧以奸利致富轉運使命晧籍之僧致白金  
千兩爲饋晧笑而卻之曰歲大凶汝有積穀六七萬能盡  
以輸官賑民則吾不汝籍僧喜諾盡輸之饑民賴以全活  
知桂陽有爭舟相毆至死者獄久不決晧出囚飲食之獨  
留一人曰汝持匕以左手今死者傷在右肋此汝殺之明  
矣囚卽服罪

罪難委奴

宋史

程琳字天球永甯軍博野人歷知制誥權三司使范雍使  
契丹命琳發遣三司使大倉贍軍粟陳腐不可食歲且饑

琳盡發以貸民凡六十萬斛饑民賴以全活而軍得善粟  
擢知開封府王蒙正子齊雄殺人貨其妻子使以病告蒙  
正聯姻太后家琳察其詞色異令有司驗之得狀太后因  
琳對諭之曰齊雄非殺人者乃其奴捶之琳曰奴無自專  
理且使令與已犯同太后默然卒論如法

釋蠱獄罪

宋 史

魯有開字元翰亳州譙人知韋城縣曹濮劇盜橫行旁縣  
間聞其名不敢入境移知確山縣興廢陂澮民田數千頃  
富弼守蔡薦之以爲有循吏風擢知金州有蠱獄當死者  
數十人有開曰欲殺人衷謀之足矣安得若是眾邪訊之

則誣天方旱獄白而雨

捕僧禁巫

宋史

陳希亮字公弼眉州青神人知長沙縣有僧海印國師出入章獻皇后家與諸貴人交通恃勢據民地人莫敢正視希亮捕治寘諸法一縣大聳徙知鄴州巫覡歲斂民財祭鬼謂之春齋否則有火災民訛言有緋衣三老人行火希亮禁之民不敢犯火亦不作毀淫祠數百區勒巫爲農者七十餘家及罷民泣曰公去我緋衣老人復出矣移知鳳翔倉粟支十二年主者以腐敗爲憂歲饑希亮發十二萬石貸民有司懼爲擅發希亮身任之是秋大熟以新易舊

官民皆便于闐使者入朝過秦州經略使以客禮享之使者驕甚留月餘壞傳舍什器縱其徒入市掠飲食民戶皆晝閉希亮聞之曰吾嘗主契丹使得其情使者初不敢暴橫皆譯者教之吾痛繩以法譯者懼其死不敢動矣況此小國乎乃使教練使持符告譯者曰入吾境有秋毫不如法吾且斬若取軍令狀以還使者至羅拜庭下希亮命坐兩廊飲食之護出其境無一人譁者

立誅叛卒

宋史

王鼎字鼎臣大名館陶人知深州王則以貝州反深卒龐旦等謀以元日殺軍校劫庫兵應之前一日有告者鼎夜

出檄遣軍校攝事外邑而陰爲之備翌日會僚吏置酒如常叛黨愕不敢動鼎刺得實徐捕首謀十八人送獄獄具候轉運使至審決未至軍中恟恟謀劫囚鼎謂僚吏曰吾不以累諸君獨命取囚桀驁者數人斬於市眾皆失色一郡帖然

用刑宜正

宋史

胥偃字安道潭州長沙人知開封府宦人程智誠與三班使臣馮文顯八人抵罪帝使赦智誠三人而文顯五人坐如法偃曰恤近遺遠非政也況同罪異罰乎詔并釋之元昊朝貢不至偃曰遽討之太暴宜遣使問其不臣狀待其

辭屈而后加兵則其不直者在彼而王師之出有名矣西塞用兵士卒妻子留京師者犯法當死帝不忍用刑或欲以毒置飲食中令得善死偃極言其不可帝亦悔而止

善御士卒

宋史

李惟賢字寶臣贈中書令昭亮子也以父蔭知莫州州倉粟陳腐戍兵大譟不肯受州人皆恐惟賢馳往諭曰邊兵眾則積粟多廩數多且積久能無陳腐乎欲盡取新則陳者何所歸遂斬首惡一流十人軍中帖然召還知冀州會遷補禁軍自隸籍後犯贓汚者皆絀爲下軍惟賢曰武士何可責以廉節且抵罪在昔今不可以新令繩之帝爲

更其令

力杜妖妄

宋史

程珣字伯溫河南人仁宗錄舊臣後以珣知龔州時宜獠區希範既誅鄉人忽傳其神降言當爲我南海立祠於是迎其神以往至龔珣使詰之曰比過潯潯守以爲妖投祠具江中逆流而上守懼乃更致禮珣使復投之順流去其妄乃息徒知漢州嘗宴客開元僧舍酒方行人謹言佛光見觀者相騰踐不可禁珣安坐不動頃之遂定

決反卒罪

宋史

楊偉字子奇建州浦城人通判單州會巡檢部卒李素合

州卒二百餘人謀殺巡檢使入鼓角門州將不敢出偉挺身往問曰若屬何爲而反俱曰將有訴於州非反也偉曰持兵來非反而何若屬皆有父母妻子以一朝忿而欲魚肉之乎悉令投兵坐籍首惡得十餘人斬之

斬扞杖卒

宋 史

呂公弼字寶臣壽州人歷知成都府其治尙寬人疑少威斷營卒犯法當杖扞不受曰甯以劍死公弼曰杖者國法劍汝自請杖而後斬之軍府肅然

竄挾怨卒

宋 史

何中立字公南許州長社人知慶州戍卒有告大校受贓



者中立曰是必挾他怨也鞭卒竄之或曰貸姦可乎中立曰部曲得持短長以制其上則人不自安矣

免逗撓罪

宋史

方偕字齊古興化莆田人爲温州軍事推官歲饑民欲隸軍就廩食州不敢擅募偕乃詣提點刑獄呂夷簡曰民迫流亡不早募之將聚而爲盜矣夷簡從之籍爲軍者七千人元昊寇塞門廊延副總管趙振不出救詔偕往按之法當斬偕奏兵寡不敵苟出以餌賊無益也振由是得免

諭民息訟

宋史

蘇頌字子容潤州丹陽人知江甯縣時建業承李氏後稅

賦圖籍一皆無藝每發斂高下出吏手頌因治訊他事互問民鄰里丁產識其詳及定戶籍民或自占不悉頌警之曰汝有某丁某產何不言民駭懼皆不敢隱遂剗剔風蠹成賦一邑簡而易行諸令視以爲法至領其民拜庭下以謝凡民有忿爭頌諭以鄉黨宜相親善若以小忿而失歡心一旦緩急將何賴焉民往往謝去或半途思其言而止

### 愛惜衣冠

宋史

蘇頌知審刑院時知金州張仲宣坐枉法加罪至死法官援李希輔例杖脊黥配海島頌奏曰希輔仲宣均爲枉法情有輕重希輔知台受賕數百千額外度僧仲宣所部金

坑發檄巡檢體究其利甚微土人憚興作以金八兩屬仲宣不差官比校止係違令可比恐喝條視希輔有間矣神宗曰免杖而黥之可乎頌曰古者刑不上大夫仲宣官五品今黥之使與徒隸爲伍雖其人無可矜所重者污辱衣冠耳帝曰善因免杖黥流海外遂爲定法

寬限完逋

宋 史

李師中字誠之楚邱人知洛川縣民有罪妨其農時者必遣歸令農隙自詣吏令當下者榜於民或詔父老諭之租稅皆先期而集民負官茶直十萬緡追繫甚眾師中爲脫桎梏語之曰公錢無不償之理寬與汝期可乎皆感泣聽

命乃令鄉置一匱籍其名許日輸所負一錢以上輒投之書簿而去比終歲逋者盡足提點廣西刑獄邕管有馬軍五百馬不能夏多死師中謂地皆險阻無所事騎奏罷之儂智高子宗旦保火峒眾無所屬前將規討以幸賞遂固守師中檄諭禍福立率其族以地降邊人化其德多畫像立祠以事稱爲桂州李大夫不敢名

### 違制故失

宋史

王曾字孝先青州益都人知審刑院舊違制無故失率坐徒二年曾請須親被旨乃坐旣而有犯者曾乃以失論帝曰如卿言是無復有違制者曾曰天下至廣豈人人盡曉

制書如陛下言亦復無有失者帝悟卒從曾議拜參知政事京師訛言有物如席帽夜飛入人家變爲犬狼狀傷人民恐每夕重閉深處操兵自衛詔立賞格募告爲妖者曾時知應天府令夜開里門有倡言者卽捕之妖亦不興尋遷吏部侍郎

軍譟不賞

宋 史

孫沖字升伯趙州平棘人爲河東轉運使會南郊賞賜軍士而汾州廣勇軍所得帛不逮他軍一軍大譟摔守佐堂下劫之約與善帛乃免城中戒備遣兵圍廣勇營沖適至命解圍弛備置酒張樂推首惡十六人斬之遂定初守佐

以亂軍所約者上聞詔給善帛使者至潞沖促之還曰以亂而得所欲是愈誘之亂也卒留不與

### 奏免毀廬

宋 史

張問字昌言襄陽人通判大名府羣牧地在魏歲久冒入於民有司按舊籍括之地數易主券不明吏苟趣辦持詔書奪其田至毀室廬發邱墓問至則曰是豈朝廷意邪具上以聞上諭大臣曰吏用心悉如問何患赤子之不安也立罷之擢提點河北刑獄

### 議獄寬平

宋 史

王吉甫字邦憲同州人累官刑部員外郎舒亶坐官燭事

執政欲律以自盜吉甫持不可南郊起幔城督役嚴急董者曰此殆類白露屋耳役卒以聞吏論死神宗怒甚吉甫求對從容言非詛咒不應死帝爲霽威得釋走馬使言蘇軾南遷所過郡守延館迎禮吉甫議當答太倉火議誅守者吉甫又力爭之皆如所請其持論寬平類此

矜慎庶獄

宋史

韓晉卿字伯修密州人官大理卿執政惡諸州多讞大辟將加劾治晉卿語執政曰祖宗之制可疑可矜者許上請仁恩之至也苟讞而獲譴誰復上請議者又欲引唐三覆奏例令天下庶獄悉奏決晉卿曰四海萬里必須繫以聽

命恐自今瘼死者多於伏辜者矣朝廷皆行其說士大夫推其忠厚

鋤惡長善

宋史

畢仲衍字夷仲丞相士安曾孫也以蔭爲陽翟主簿張昇縣人也方鎮許請於朝欲興鄉校旣具材計工又聽民自以其力輸助邑子馬宏以口舌橫閭里謾諸豪曰張公興學而縣令乃因以取諸民由十百而至千萬未已也君將不堪誠捐百金予我我能止役豪信其能予百金宏卽詣府宣言縣吏盡私爲學之費又將賦於民昇果疑焉敕縣且止又揭其事於道令欲上疏辯仲衍曰無益也不如取



宏治之不辯自直矣會攝縣事逮捕驗治五日得其姦言於昇流宏鄧州一縣相賀給事中張問居里中謂仲衍曰諺云鋤一惡長十善君之謂也

坐告訐罪

宋史

杜純字孝錫濮州鄆城人以蔭爲大理正上言比來告訐者眾或徒隸缺望或民相怨仇或意冒賞賚泛云某有罪某知狀官不識所逮之囚囚不省見逮之故若使有司先計其實而坐爲欺者以誣當無不竟矣

厚譴宗室

宋史

王安禮字和甫安石弟也從河東唐介辟熙甯中鄜延路

城囉兀河東發民四萬負餉宣撫使韓絳檄使佐役後帥  
呂公弼將從之安禮爭曰民兵不習武事今驅之深入此  
不爲寇所乘則凍餓而死耳宜亟罷遣公弼用其言民得  
歸而他路遇敵者民軍皆覆公弼執安禮手言曰四萬之  
衆豈偶然哉果有陰德相與共之以翰林學士知開封府  
宗室令駢以數十萬錢買妾久而斥歸之訴府督元直安  
禮視妾旣火敗其面矣卽奏言妾之所以直數十萬者以  
妾首也今炙敗之則不復可鬻此與炮烙之刑何異請勿  
理其直而加厚譴以爲戒詔從之

### 治匿名書

### 增智囊補

王安禮知開封府邏者連得匿名書告人不軌所涉百餘人帝付安禮令亟治之安禮驗所指畧同最後一書加三人有姓辭者安禮喜曰吾得之矣呼問辭曰若豈有素不快者邪曰有持筆求售者拒之鞅鞅去其意似相銜卽命捕訊果其所爲梟其首於市不逮一人京師謂爲神明

妖人諱角

宋史

何執中字伯通處州龍泉人調亳州判官毫數易守政不治會鞏至頗欲振起之顧諸僚無可仗信者執中一見合意事無纖鉅悉委以剴決有妖獄久不竟株連寢多執中訊諸囚聽其相與語謂牛羊之角皆曰股扣其故閉不肯

言而相視色變執中曰是必爲師張角諱耳卽扣頭引伏

重入輕出

宋史

喬執中字希聖高郵人提點開封刑獄朝廷議取諸縣收地民占耕歲久當平邱墓伐桑柘萬家相聚而泣執中爲請於朝詔復與民改提點西京北路刑獄會河決廣武婦危甚相聚莫敢登執中挺身立其上隨者如蟻不日埽成擢給事中有司議天下讞獄失出入者與同坐執中駁之曰先王重入輕出恤刑之意一旦均之自是法吏不復肯與生比非皇上好生之仁以寶文閣侍制知鄆州爲政寬厚屢雪刑獄活以百數

神帽非御服

宋史

李宗伯字會之河陽人知太康縣建言朝廷行方田均稅之法令以豐歲推行今州縣吏苟簡懷異者指熟爲災而貪進幸賞者指災爲熟望深察其違戾而寘諸罰入爲將作少監開封民有鬻神祠故帽飾以龍者吏以爲乘輿服御宗伯曰此無他當坐不應爲爾尹不從具以請如宗伯議累遷刑部侍郎

發錢治卒

宋史

趙挺之字正夫密州諸城人通判德州哲宗卽位賜士卒緡錢郡守貪毫不時給卒怒譁持白挺突入府守趨避左

右盡走挺之坐堂上呼問狀立發庫錢而治其爲首者眾  
卽定

懲奴械吏

宋史

吳擇仁字智夫以父任爲開封雍邱主簿畿內饑多盜以  
擇仁知大鹿縣始至召令賊曹曰民窮而盜非天性也我  
以靜鎮之若亡命椎埋故犯我一切誅之毋得貸羣盜相  
戒不入境中貴人譚稹奴犯法擇仁按致於理稹羞恚譖  
之於上上使宋喬年往鞫喬年伉吏也疾驅至慮囚摘隱  
剔挾帑庾出入不能得毫毛罪乃歸傳舍擇仁上謁喬年  
迎笑曰所以來爲察君罪顧乃得一奇士吾今薦君矣尋

召詣闕拜戶部侍郎兼知開封故事三日一聽訟庭下列  
曹吏十輩呼云某人送獄某人當杖某人去而尹無所可  
否擇仁視事日有竇鑑者以捕盜官諸司使服金帶狃故  
習來前擇仁叱而械諸獄一府大驚賣珠人倚勢匿宦官  
楊戩第擇仁迹取之投竄於遠戩中以事出知熙州

不媚權要

宋史

沈畸字德侔湖州德清人官監察御史上十事其論當十  
夾錫錢略曰小錢之便於民久矣古者軍興用之或以一  
當百至十當千此權時之術非可行於無事之世今當十  
之議固足紓目前然使游手鼓鑄無故有倍稱之息何憚

而不爲雖日加斷斬勢不可止恐未能期歲東南小錢輕  
錢輕則物重物重則民愈困此盜賊所由起也陝西舊無  
銅錢故以夾錫爲貴一切改鑄則猶前日鐵錢耳今東南  
方私鑄又將使西北効之是導民犯法也蔡京怨劉逵會  
蘇州盜鑄錢獄起京欲陷逵婦兄章綖兄弟遣李孝壽鞠  
之株連者千餘人京猶以爲緩遣畸往代畸卽日決釋無  
左證者七百人歎曰爲天子耳目司而可傳會權要殺人  
以苟富貴乎遂閱實平反以聞京大怒削畸三秩

救諸將死

宋史

侯蒙字元功密州高密人進士及第調寶雞尉知柏鄉縣



民訟皆決於庭受罰者不怨遷侍御史夏人寇涇原遂誘吐蕃圍宣威城執知鄯州高永年殺之帝怒親書五路將帥劉仲武十八人姓名敕蒙往秦州逮治獄既具蒙奏言漢武帝殺王恢不如秦穆公赦孟明子玉縊而晉侯喜孔明亡而蜀國輕今羌殺吾一都護而使十八將由之以死是自戕其肢體也帝悟釋不治遷刑部尙書

戲言當杖

宋 史

以龍圖閣直學士范純禮知開封府前尹以刻深爲治純禮一切以寬處之中旨鞠享澤村民謀逆純禮審其故此民入戲場觀優歸途見匠者作桶取而戴於首曰與劉先

主如何遂爲匠擒明日入對徽宗問何以處之對曰愚人村野無所知若以叛逆蔽罪恐辜好生之德以不應爲杖之足矣曰何以戒後人曰正欲外間知陛下刑憲不濫足以爲訓耳徽宗從之拜禮部尙書

### 赦亡卒罪

宋史

時金兵至河北吏部侍郎程振請糾諸道兵犄角擊之曰彼猖獗如此陛下尙欲守和議而不使之少有懲艾乎上嗟咏其言而牽於外廷不能用拜開封府尹故時大辟有情可矜多奏取原貸崇甯以來議者謂輦轂先彈壓率便文殺之振請復舊制詔捕亡命卒得數千人振請以隸步

軍而除其罪步軍司欲論如法振曰方多事之際而一日殺數千人必大駭觀聽乃盡釋之

將亂莫弛

宋史

樓鑰字大防明州鄞縣人知温州屬縣樂清或倡言方臘之變且復起邑令捕數人歸於郡鑰曰罪之則無可坐縱之則惑民聽編諫其爲首者而驅其徒出境民言遂定堂帖問故鑰曰蘇洵有言有亂之形無亂之實是謂將亂不可以有亂急不可以無亂弛丞相周必大善之

吏鞫現在

宋史

楊簡字敬仲慈溪人授富陽主簿富陽民多服賈而不知

學簡興學養士文風益振遷紹興府司理犴獄必親臨端  
默以聽使自吐露越陪都臺府鼎立簡中平無頗惟理之  
從一府吏觸怒帥令鞠之簡白無罪命鞠平日簡曰吏過  
詎能免今日實無罪必擯往事置之法某不敢奉命帥大  
怒簡取告身納之爭愈力吏獲免

告神獲犯

宋 史

葉立志字仲愿調南安縣尉縣有死獄檄往驗視一屍無  
首人皆難之立志焚香告天夜設榻屍側夢神人曰死者  
之首投於溪北殺之者已遁於潮之小江矣毋發急詣溪  
北尋之果獲移文至小江捕之見一人磨刃江側捕者詰

之曰汝非南安殺人者乎其人驚怖刃墮地於是就擒一  
鞠卽服人稱其神

祝詛自斃

宋史

陳仲微字致廣瑞州高安人知莆田縣事時歲凶部卒并  
饑民作亂者戮之籍閉糴抑強糴一境以肅囊山浮屠與  
郡學爭水利久不決仲微按法曰曲在浮屠他日過寺其  
徒揭其事鐘上以爲冤旦暮祝詛然莫省爲仲微也仲微  
見之曰吾何心哉吾何心哉質明首僧無疾而死

斬將肅軍

宋史

董槐字庭植定遠人厯提點湖北刑獄常德軍亂夜縱火

而謀守尉闖不出槐騎從數人詣火所且問亂故亂者曰將軍馬彥直奪吾歲請吾屬將責之償不爲亂也槐坐馬上召彥直斬馬前亂者還入伍中明日乃捕首亂者七人戮諸市而賻彥直之家徒知江州主管江西安撫司公事胥吏震恐不敢侵民更講求民生利害與張弛之大計次第舉行蒐討軍實常若敵至裨將盧淵凶猾不受命槐斬之一軍肅然擢知建康立賞格三等教射士肄坐作進退擊刺之技盡爲精兵

饑民非盜

宋史

李舜臣字子思隆州井研人調邛州安仁縣主簿歲大侵

饑民千百持鉏棘大呼響震邑市令懼閉門舜臣曰此非盜也何懼爲亟出慰勞遣之知饒州德興縣專尚風化間詣學講說邑士皆稱蜀先生罷百姓預貸償前官積逋踰三萬緡民病差役舜臣勸糾諸鄉以稅數低昂定役期久近爲義役期年役成民大便利

核倉吏罪

宋史

張洽字元德臨江之清江人官松滋尉湖石經界不正弊日甚洽請行推排法令以委洽洽於是令民自實其土地疆界產業之數投於匱乃籌覈而次第之吏姦無所匿其後十餘年訟者猶援以爲證云改袁州司理參軍郡守以

倉廩虛籍倉吏二十餘家命洽鞠之治廉之爲都吏所賣  
都吏者州之巨蠹也嘗干於倉不獲故以此中之治度守  
意銳未可嬰姑繫之而密令計倉庾所入以白守曰君之  
籍二十餘家者以胥吏也今校數歲之中所入已豐於昔  
由是觀之胥吏妄矣君必不忍受胥吏之妄而籍無罪之  
家也若以罪胥吏過乃可免守悟爲罷都吏而免所籍之  
家

單車察寇

宋史

張治知永新縣一日謁告聞獄中榜笞聲蓋獄吏受財乘  
間訊囚使誣服也治大怒亟執付獄明日以上於郡黥之



湖南鄱寇作亂與縣接壤民大恐洽單車以往邑佐寓士  
交諫弗聽至則寇未嘗至乃延見隅官訪利害而犒之因  
行安福境上結約土豪得其懽心未幾南安舒寇將犯境  
聞有備乃去尋通判池州獄有張德修者誤蹴人以死獄  
吏誣以故殺治訊而疑之請再鞠守不聽會提點常平袁  
甫至時方大旱禱不應洽言於甫曰漢晉以來濫刑而致  
旱伸冤而得雨載於方冊可考也今天大旱焉知非由德  
修事乎甫爲閱疑狀於獄德修遂從徒罪復白郡請蠲征  
稅寬催科以召和氣守爲寬稅三日果大雨民甚悅

斬盜靖譁

宋史

史彌鞏字南叔彌遠從弟也提點江東刑獄休甯有淮民三十餘輩操戈劫人財逮捕法曹以不傷人論罪彌鞏曰持兵爲盜貸之是滋盜也推情重者僂數人一道以安饒州兵籍溢數供億不繼請汰冗兵令下營門大譟彌鞏呼諸校謂曰汰不當許自陳敢譁者斬諸營帖然廩給亦大省擢知婺州

斷田歸岳

宋史

幸元龍字震甫高安人初尉京邑時万俟卨之孫與岳飛家爭田歲久不能決府委元龍裁斷積案如山元龍並不閱視卽擬云岳武穆一代忠臣万俟卨助檜逆賊雖籍其

家不足以謝天下尙敢與岳氏爭田乎田歸於岳卷付於火時論譴之

不妄邀福

金史

趙元字善長涿州范陽人天會間同知薊州事有賊殺人橫道官吏圍視莫知所爲路人耕夫聚觀甚眾元指田中釋耒而來者曰此賊也叱左右縛之遂伏僚吏問其故元曰偶得於眉睫間耳天眷三年爲行臺右司員外郎因有殺人當死者行臺欲宥之元不從反覆數四勢不可回乃仰天嘆曰如殺人者可宥死者復何辜何欲徼已福而亂天下法乎行臺竟不能奪

雪同飲冤

金史

李完字全道朔州馬邑人歷同知廣甯府初遼濱民崔元入城飲不歸求得屍於水中有司執同飲者訊之皆誣服提刑司疑其冤以獄畀完完廉得其賊乃舟師也遂免同飲人尋授南京路按察使

焚亂黨籍

金史

石皋定州人補郡吏從魯王闕母攻青州州人堅守不降闕母怒之及城破命皋計州民人數將使諸軍分掠有之皋緩其事闕母讓之皋曰大王將爲朝廷撫定郡縣當使百姓安堵若取城邑而殘其民則未下者必死守以拒我

舉之稽緩安敢逃罪閭母感悟乃下令曰敢有犯州人者以軍法治指其坐謂舉曰汝之子孫必有居此坐者舉隨守定州唐縣人王八謀爲亂書其縣人姓名於籍無慮數千人其黨持其籍詣州發之舉主鞠治是時冬月舉抱籍上聽事佯爲頓仆覆其籍爐火中盡焚之不可復得其姓名止坐爲首者餘皆得釋子琚生七歲讀書過目卽成誦天眷二年中進士第一歷官宰相

摹篆非寶

金史

賈鉉字鼎臣博州博平人官左諫議大夫上書曰親民之官任情立威所用決杖分徑短長不如法式甚者以鐵刃

置於杖端因而致死間者陰陽愆戾和氣不通未必不由此也願下州郡申明舊章檢量封記按察官其檢察不如法者具以名聞亳州醫者孫士明輒用黃紙大書敕賜神針先生等十二字及於紙尾年月間摹作寶樣朱篆青龍二字以誑惑市人有司捕治款伏值赦大理寺議宜準偽造御寶雖遇赦不應原已奏可矣鉉奏天子有八寶其文各異若偽造不限用泥及黃蠟今用筆描成青龍二字既非八寶文論以偽造御寶非本法意上悟遂赦之謂大臣曰已行之事賈鉉猶執奏甚可嘉也羣臣亦當如此矣

虛言無寶

金史

劉肅字才卿威州洛水人爲尙書省令史有盜內藏官羅及珠盜不時得逮繫貨珠牙僧及藏吏誣服者十一人議置極刑肅執之曰盜無正賊殺之寃金主怒有近侍夜見肅具道其旨肅曰辨析寃獄我職也惜一已而戕十一人之命可乎辨愈力張天綱爲具奏辨析之得不死調新蔡令先時縣賦民以牛多寡爲差民匿不耕肅至命樹畜繁者不加賦民遂殷富潁淮民有竄入宋境籍爲兵而優其糧間有歸者頗艱於衣食時出怨言曰不如渡淮告者以謀叛論肅曰淮隄宋境一水耳果欲叛不難往也口雖言而心無實準律當杖八十奏可

迎詔失儀

金史

馬琪字德玉大興寶坻人爲中都路都轉運使時戶部闕官上命宰臣選可任者或舉琪上然之曰琪不肯欺官亦不肯害民是可用也遂擢爲戶部尙書久之削官一階初琪病告近侍傳旨不具服曳履而出有司議當徒二年減外猶追官解任大理少卿閻公貞以爲琪本惶遽失措與非病告有違不同宜減徒二年三等論之上從公貞議任職如故

亂民非叛

金史

大懷貞字子正遼陽人累官安武軍節度使縣尉獲盜得



一旗上圖亢宿詰之有謀叛狀株連幾萬人懷貞請誅其  
首亂者十八人餘皆釋之嘗以私忌飯僧數人就中一僧  
異常懷貞問汝何許人對曰山西人復問曾爲盜殺人否  
對曰無之後三日詰盜果引此僧皆服其明察

察告逆誣

金史

馬諷字良弼大興遼陰人爲獻州刺史民有告謀不軌者  
株連數十百人諷察其無狀乃究問告者具伏其誣眾懼  
呼感泣入爲大理少卿

扼要弭亂

金史

張弈字彥微澤州高平人仕齊爲歸德府通判齊國廢齊

兵之在郡者二萬人謀爲亂約夜半舉燎相應奔知之選市人丁壯授以兵結陣掘其要巷開小南門以示生路亂不得作比明亡匿畧盡擒其首惡誅之後五日都統完顏魯補以軍至歸德欲根株餘黨奔以闔門保郡人無他遂止擢同知太原尹

鉤奴察盜

金史

完顏伯嘉字輔之北京路訛魯古必刺猛安人爲中都左警巡判官孝懿皇后妹晉國夫人家奴買漆不酬直伯嘉鉤致晉國用事奴數人繫獄晉國白章宗章宗曰姨酬其價則奴釋矣由是豪右屏迹累官莒州刺史讞屬縣盜伯

嘉曰饑寒爲盜得錢二千經月不使一錢云何此必官兵捕他盜不獲誣以準罪耳詰之果然召爲御史中丞會抹撚胡魯刺以言事忤旨集五品以上官顯責之伯嘉諫曰自古帝王莫不欲法堯舜而恥爲桀紂蓋堯舜納諫桀紂拒諫也故曰納諫者昌拒諫者亡胡魯刺所言是有益於身所言不是無損於國陛下廷辱如此獨不欲爲堯舜乎近日言事者語涉謗訕有司當以重典陛下釋之與其釋之以爲恩曷若置之而不問乎人臣有忠國者有媚君者忠國者或拂君意媚君者不爲國謀如近日宰相請修山寨以避兵獨不見陳後主之入井乎假令得生必不能爲

國矣

察無叛情

金史

趙楠字才美高平人歷官刑部郎中定國節度使僕散納坦出之子忙押門與兄石里門及護衛顏蓋宗阿同飲忙押門詐以事出投北兵省詔楠推其家屬及同飲人時上下迎合必欲以知情處之至於忙押門妻皆被訊掠其母完顏氏曰忙押門通其父妾父殺此妾忙押門不自安遂叛求脫命而已委曲推問無知情之狀省中微聞之召小吏郭從革喻以風旨從革言之楠方食擲匕筯於案大言曰甯使趙楠除名亦不能屈斷無辜人遂以不知情奏且

以妾事上聞上命赦出之

杖犯禁僧

金史

王脩字脩然涿州人知大興府事時僧徒多游貴戚之門脩惡之乃禁僧午後不得出寺嘗有僧犯禁皇姑大長公主爲請脩曰奉主命令卽出之立召僧杖一百死京師肅然

杖請屬豪

金史

完顏承輝字惟明知大興府事宦者李新喜有寵用事偕大興府妓樂承暉不與新喜慙章宗聞而嘉之豪民與人爭種稻水利不直厚賂元妃兄左宣徽使李仁惠仁惠使

人屬承暉右之承暉卽杖豪民而遣之謂其人曰可以此報宣徽也

力折權要

金史

李仲畧字簡之澤州高平人知大興府事紇石烈執中坐賊上命仲畧鞠之罪當削解權要競言太重上頗然之重畧奏曰教化之行當自近始京師四方之則也郡縣守令無慮數百此而不懲何以勵後況執中兇殘很愎慢上虐下豈可宥之上曰卿言是也授山東東西路按察使

呼名獲謀

金史

趙重福字履祥豐州人官同知陳州防禦事宋謀人蘇泉

折獄龜鑑補

卷五 雜犯上

七十二

入河南重福迹之至魚臺將渡河見前一舟且渡令從者大呼泉姓名前舟中忽有愴惶失措者執之果泉也改滄州鹽副使歲饑民煮鹵爲鹽賣以給食鹽官往往杖殺之重福曰甯使課殿不忍殺人歲滿課殿當降尙書右丞完顏匡三司使按出虎知其事乃以歲荒薄其罰

紀律宜嚴

金史

元兵旣逼詔以完顏仲德行關陝以南元帥事遂扈從至蔡領省院事無鉅細率親爲之選士括馬繕治甲兵未嘗一日無西志提控李德率十餘人乘馬入省大呼謂月糧不優幾於罵詈仲德大怒縛德杖之金主諭之曰此軍得

力方欲倚用卿何不容忍仲德曰時方多故錄功隱過自  
陛下之德至於將帥之職則不然小犯則決大犯則誅強  
兵悍卒不可使一日不在紀律蓋小人之情縱則驕驕則  
難制睢陽之禍豈獨官奴之罪亦有司縱之太過耳今欲  
更易前轍不宜愛克厥威賞必由中罰則臣任其責軍士  
聞之至於國亡不敢有犯

### 正逃將罪

金史

謀告歸德行樞密院言河朔叛軍有竊謀南渡者行院事  
胡土門都水監毛花輦易其人不爲備未幾果連筏大謀  
傷殘下邑而去命侍御史馮璧鞠之坐以聞寇弛備來旣



不戰去又不追在法皆當斬或言二將皆寵臣都水復累  
巨貲若求援禁近必從輕典君徒結怨何益璧曰睢陽行  
關東藩重兵所宿門庭之寇且不能禦有大於此者復何  
望乎卽具所擬以聞關中旱詔與吏部侍郎畏忻審理冤  
獄時河中帥阿虎帶及僚屬十數人皆坐繫獄同州官僚  
問何以處之璧曰河中今日重地行且爲駐蹕之所設若  
失之則河南陝西有腎亡之憂以彼宗室勲貴故使鎮之  
平居無事竭民膏血爲浚築計一旦有警乃遽焚蕩而去  
此而不誅三尺法無用矣竟以論死

征討之際隸軍籍者憚於行役往往募人代之又軍中多  
逃歸者朝廷下制募人代役者杖百逃歸者死命斷事官  
布魯海牙按順天等路及至州縣得募人代者萬一千戶  
逃者十二人然募者聞命將下已潛遣家人易代募者海  
牙曰募者已懼罪往易逃者因單弱思歸情皆可矜遂奏  
輕減有丁多產富而家人不往及未至役所卽逃者則曰  
此而不殺何以戒後有竊妓逃者吏論當死海牙曰敗亂  
綱常罪固宜死此妓也豈可例論命杖之

誣告謀反

元史

阿魯渾薩里畏兀人宿衛內朝有江南人言宋宗室反者

命遣使捕之使已發阿魯渾薩里入諫曰言者少妄使不可遣帝曰何也對曰若果反郡縣何以不知言者不由郡縣而言之闕庭必其仇也且江南初定民疑未附一旦以小民浮言輒捕之恐人人自危徒中言者之計帝悟立召使者還俾械繫言者下郡治之言者立伏果以嘗貨錢不從誣之帝曰非卿言幾誤但恨用卿晚耳擢左侍儀奉御

禁賣墳地

元史

郭質字安道保安人拜監察御史承詔分江北沿淮草地又言近見江淮無知諸人多有發掘父祖墳墓將地改售於人者止圖利已莫恤祖宗往往聽信野師妄以風水誑

惑曰某山強則某支富某水弱則某支貧或曰茲山無鼎  
鼐之形安得出一品之貴茲山無倉庫之象安得致千金  
之富於是有一墓而屢遷不已者有子孫不肖不能固守  
從而墮師巫之術但知多取價鈔忍於拋掘者甚有豪強  
之家貪信風水不惜金錢誘之遷移轉賣者更有圖殉葬  
之金銀破祖宗之棺槨并投骸骨於水火者當今世風澆  
薄爲人後者不務勤儉破蕩財產及至貧乏不自咎責反  
謂先塋風水不利所致以致輕發祖先塋地高價貨賣不  
仁不孝情罪非輕若非明定嚴刑切恐愚民沿襲視爲泛  
常嗣後移棄屍骸不爲祭祀者合同惡逆定罪買地人知

情者減二等科斷元價沒官野師並行責逐庶幾令嚴而民不敢犯刑曹是其言著爲令

### 保降卒命

元史

沈璋字子達奉聖州永興人迪古乃軍至上谷璋與李師夔謀開門降從平潞州命璋知潞州事璋至招復逋逃賑養困餓收葬橫屍初賊黨據城潞之軍卒當緣坐者七百人帥府牒璋盡誅之璋不從帥府大怒欲殺璋璋顏色不動對曰招亡撫從璋之職也此輩初無叛心蓋爲賊所脅有不得已者故招之復來今欲殺之是殺降也苟利於眾璋死何憾乃皆釋之改同知太原尹時介休人張覺聚黨

亡命山谷鈔掠邑縣招之不肯降曰前嘗有降者皆殺之  
今以好言誘我是欲殺我耳獨得侍郎沈公一言我乃無  
疑於是命璋往招之覺卽日降

保全巨室

元史

伯顏伐宋賈居貞以宣撫使議行省事旣渡江下鄂漢伯  
顏以大軍東下居貞以僉行省事留鄂於是發倉儲以振  
流亡東南未下州郡商旅留滯者給引以歸免括商稅并  
湖荻禁蘄州民傅高起兵應宋閩廣二王居貞遣宣慰鄭  
鼎將兵討之鼎言鄂之大姓皆與高通請誅之以絕禍本  
居貞曰高鼠子無知行就戮耳大姓何預吾能保其無他

所全者眾遷江西參政時逮捕民間受宋二王文帖者甚急坐繫巨室三百餘居貞至悉出之投其帖於火士卒有挾兵器入民家誣爲藏匿以取財者皆痛繩以法南安李梓發作亂慮將帥出擾民下令親征營於城北遣人諭之眾聞居貞至皆散匿不爲賊用梓發自焚死師還不戮一人杜萬一亂都昌調兵擒之有列巨室姓名百數來上謂與賊通居貞曰元惡誅矣蔓延何爲命焚其牒

止殲渠魁

元史

王機字巨川鳳翔虢縣人金授副統軍守涿鹿隘元太祖將兵南下機鏖戰三日兵敗見執將戮之神色不變太祖

義而釋之授都統佩以金符時河間清滄復叛帝命檄討之復命駙馬孛禿分蒙古軍及乂漢軍三千屬檄遂復河間得軍民萬口孛禿惡其反覆欲盡誅之檄解之曰驅羣羊使東西者牧人也羊何知哉殲其渠魁足矣釋此輩遷之近縣强者使從軍弱者使爲眾此天之所以畀我也何以殺爲從圍燕京燕京降檄進言曰國家以仁義取天下不可失信於民宜禁俘掠以慰眾望時城中絕粒人相食乃許軍士給糧入城轉糶又以田野久荒兵後無牛具索軍回所驅牛十取其一分給近縣民大悅

論羌止亂

元史



張庭瑞字天表臨潢全州人以宿衛從憲宗伐蜀爲先鋒  
蜀平陞諸蠻夷部宣慰使甚得蠻夷心蜀碉門羌入市爭  
價殺人碉門魚通司繫其人羌酋怒斷繩橋謀亂左丞汪  
惟正問計庭瑞曰羌性悍以鬪殺爲勇今如蜂毒一人而  
卽以門庭之寇待之不可宜遣使往諭彼悟當自回矣惟  
正曰使者無過於君庭瑞從數騎往諭之曰殺人償死羌  
與中國之法同有司繫諸人欲以爲見證耳而汝卽肆無  
禮如行省聞於朝召近郡兵空汝巢穴矣其酋長棄槍弩  
羅拜曰我近者裂羊髀卜之曰有白馬將軍來可不勞兵  
而罷今公馬果白敢不從命乃諭殺人者餘盡縱遣之遂

與約自今交市者以礮門爲界無相出入

爲主宜旌

元史

崔斌字仲文馬邑人從伐宋圍潭州斌攻鐵壩挾盾先登  
阿里海牙持酒勞之斌曰潭人膽破矣若斂兵不進許其  
來降則土地人民皆爲我有重湖以南可傳檄而定若縱  
兵急攻彼無噍類得一空城何益從之卽遣開示禍福城  
中爭出降諸將怒其抗敵持久咸欲屠之斌曰彼各爲其  
主耳宜旌之以勸未附者且殺降不祥諸將乃止

軍民無異

元史

王慶端字正甫藁城人官侍衛都指揮使建威武營以處

衛兵經畫田廬使各安業別立神鋒軍親教以蹶張弩技  
作整暇堂屏利局浚渠構室如治家事改詹事丞時有司  
欲就威武貨粟數萬石濟饑民裕宗在東宮以問慶端慶  
端對曰兵民等耳何間焉卽命與之帝嘗遣近侍夜出伺  
察爲邏卒所執近侍以實告卒曰軍中惟知將軍令不知  
其他近侍以聞帝賞以黑貂裘

除强猾豪

元史

趙璧字寶仁雲中懷仁人爲河南經略使河南劉萬戶貪  
淫暴戾其黨輩主簿尤恃勢爲虐强取民女三十餘人璧  
按其罪立斬之劉大驚時天大雪因詣璧相勞苦且酌酒

賀曰經略下車誅鋤強猾故雪爲瑞應璧曰如董主簿比者尙有其人俟盡誅之瑞應當大至矣劉屏氣不復敢出語歸卧病數日以懼死

盡縱俘民

元史

時張世傑奉益王昰走台州閩中亦爲宋守復敕中書左丞董文炳進兵所過禁士馬毋踐田麥曰在倉者吾旣食之在野者汝又踐之新邑之民何以續命以故南人感激所至輒下次台州盡縱諸將所俘台民得免者數萬口由温州踰嶺而南漳泉建甯邵武諸郡相繼送款閩人感其德立廟祀焉

恩威並用

元史

詔復以忽辛爲雲南行省左丞豪民避徭役往往投王府  
宿衛家有司不勝供給忽辛按元額所無者悉籍爲民去  
宿衛三分之二馬龍州土司謀叛陰與外賊通持所授宣  
敕納賊以示信事覺宗王將不問忽辛反覆研鞫得反狀  
竟斬之緬國主貢固不臣忽辛遣人諭之曰我老賽典赤  
平章子也惟先訓是遵凡官府於汝國所不便事當一切  
爲汝更之緬國主聞之遂與使者偕來獻白象一旦曰此  
象古來所未有今聖德所致敢效方物旣入帝賜緬主以  
世子號烏白蠻應輪租賦歲發軍徵索忽辛以勝諭之不

遣一卒而額賦完

釋輕罪囚

元史

暢師文字純甫南陽人歷官太平路總管時大旱師文捐俸致禱不數日澍雨大降遂爲豐年當塗人坐殺牛祈雨囚繫者六十餘人師文憫而出之公田米積之盈屋曰我家幾人能盡食此乎召貧士及細民恣其取去廉訪分司官前後至者必先謁師文稱爲先生

亟焚禁書

元史

張昇字伯高平州人知汝甯府民有告寄束書於其家者踰三年取閱有禁書一編且記里中大家姓名於上昇亟

焚其書曰妄言誣民且再更赦矣勿論同列懼皆引起旣而事聞廷議謂昇脫姦軌遣使窮問卒無跡可指乃詰以擅焚書狀昇對曰事固類姦軌然昇備位郡守爲民父母今斥誣訴免冤濫雖重得罪不避乃坐奪俸二月

饑非故盜

元史

時湖廣省臣僞爲警報馳驛入奏以圖柄用右司郎中敬儼面詰之曰汝守方面旣有警豈得離職是必虛誕耳其人竟以狀露被斥旱蝗爲災民多因饑爲盜有司捕治論以真犯獄旣上儼曰民饑而盜迫於不得已非故爲也且死者不可復生宜在所矜貸用是得減死者甚眾

雪冤得雨

元史

王暉字仲謀衛州汲縣人爲平陽路總管府判官初太平縣民陳氏殺其兄行賂緩獄蔓引逮繫者三百餘人至五年不決朝廷委暉鞫之一訊卽得其實乃盡出所逮繫者時絳久旱一夕大雨尋拜監察御史劾都水劉晟監修太廟畢功纔數年梁柱摧朽事涉不敬宜論如法權貴不能容出爲平陽路判官

求神冤白

元史

觀音奴字志能唐兀人累知歸德府彰德富商任甲至睢陽驢斃令郤乙剖之任以怒毆乙經宿死乙有妻王氏妾



孫氏孫告官官吏納任賄反坐孫罪下之獄王來訴冤觀音奴立出孫於獄呼府胥語之曰吾爲文具香幣若爲吾以乙事祈諸城隍令神顯應有睢陽小吏亦預乙事畏觀音奴之明且懼神之靈也乃自陳曰乙實傷死任賂上下匿其情吾亦得賄敢以首於是罪任商而釋乙妾甯陵豪民楊甲夙謀王乙田不能得值王以饑挈其妻就食淮南而王得疾死其妻還則田爲楊據矣王妻來訴楊行賄僞作文憑曰王在時已售我觀音奴令就崔府君祠質之楊懼神靈先以羊酒浼巫求神勿洩其事及兩造詣祠質之果無所顯明觀音奴疑之召巫詰問巫吐其實乃坐楊罪

還王氏田責神而撤其祠

毀磴灌田

元史

耶律伯堅字壽之桓州人爲清苑縣尹縣西有塘水溉民田甚廣勢家據以爲磴民以失利來訴伯堅命毀磴決其水而注之田許以溉田之餘月乃得堰水置磴仍以事聞於省部著爲定制縣居南北之衝歲爲親王大官治供帳於縣西限以十月成至明年復撤而新之吏得並緣侵漁其費不貲伯堅命築公館以代供帳其弊遂絕凡郡府賦役於縣有重於他縣者輒曰甯得罪於上不可得罪於下必詣府力爭在清苑四年民視之如父母比遷去立石頌

其德

官酷被戕

元史

袁裕字仲寬洛陽人官開封府判官洧川縣達魯花赤貪  
暴盛夏役民捕蝗禁不得飲水民不勝忿擊之而斃有司  
當以大逆實極刑者七人從坐者五十餘人裕曰達魯花  
赤自犯罪怒而死安可悉歸罪於民議誅首惡者一人餘  
各杖之有差部使者錄囚至縣疑其太寬裕辨之益力遂  
陳其事狀於中書刑曹竟從裕議

重懲惡奴

元史

張礎字可用真定人歷知威州有婦人乘驢過市者投下

官暗赤之奴引鳴鏑射婦人墜地奴匿暗赤家礎將以其事聞暗赤懼乃出其奴論如法己爲江南浙西道副使遂安縣民聚眾負險爲亂命礎與浙西宣威同知劉宣往討宣銳欲進兵礎曰江南新附守吏或失撫綏宜遣人招之以全眾命宣不可礎曰招之不來加誅未晚遂遣人往諭逆黨果自縛請罪礎釋之宣乃嘆服

### 雪賣毒冤

元史

王利用字國賓通州潞縣人歷官安西興元兩路總管在興元減職租額站戶之役於他郡者悉除之民甚便焉有婦毒殺其夫問藥所從來吏教婦指富商所貨獄上利

用曰家富而貨毒藥豈人情哉訊之果寃

罪別輕重

元史

行臺御史劾江浙平章不法者十七事遣中臺侍御史尙文往按平章堅不服且訐御史違制取會防鎮軍數帝命省臺大臣議咸曰平章勲臣後所犯者輕事宜宥御史取會軍數法當死文抗言平章罪狀明白不受簿責無人臣禮其罪非輕御史糾事之官因兵卒爭愬責其帥如籍均役情無害法卽有罪亦輕廷辨數四與臺省入奏帝悟平章御史各坐杖遣

寬犯獵罪

元史

韓若愚字希賢保定滿城人累擢吏部郎中仁宗卽位故事凡潛邸官吏不次遷轉若愚以歲月定其資品遂著爲令尋擢中書左司郎中初有議禁民畋獵犯者抵死若愚曰齊宣王之圍方四十里殺其麋鹿者如殺人之罪孟子非之眾以爲然遂減其刑

齋禱明冤

元史

田滋字榮甫開封人累拜浙西廉訪使有縣尹張或者被誣以賊獄成問之但俛首泣不語滋大疑明日齋沐詣城隍祠禱曰張或者坐事有冤狀願神相滋明其誣守廟道士進曰曩有王成等五人同持誓狀到祠焚禱火未盡而去

爐中得其遺藁今藏壁間豈其人邪視之果然明日詣憲司詰成等不服出火中誓狀示之皆驚愕伏辜或遂得釋改陝西行省參知政事時陝西不雨三年道過西嶽因禱曰滋奉命來參省事而安西不雨者三年民饑而死滋將何歸願神降甘澤以福黎庶到官果大雨滋卽開倉以麥五千餘石給小民之無種者俾來歲收成以償官民大悅

驗身知冤

元史

鄧文原字善之錢塘人歷官僉江南浙西道肅政廉訪使吳興民夜歸巡邏者執之繫亭下其人遁去有追及之者刺其脅仆地明旦家人得之以歸比死其兄問殺汝者何

如人曰白帽青衣長身者也其兄愬於官有司問直初更者曰張福兒執之使服焉械繫三年文原錄之曰福兒人不滿六尺未見其長也刃傷右脅而福兒素用左手傷宜在左何右傷也鞫之果得真殺人者

### 除造鈔害

元史

林興祖字宗起福州羅源人累知鉛山州鉛山素多造偽鈔者豪民吳友文爲之魁江淮燕薊莫不行使友文奸黠很鷙因偽造致富乃分遣惡少四五十人爲吏於有司伺有欲告之者輒先事戕之前後殺人甚眾奪人妻女十一人爲妾民懼其害銜冤不敢訴者十餘年興祖至官曰此



害不除何以牧民卽張榜禁僞造者且立賞募民首告俄有告者至佯以不實斥去又有告獲僞造二人并贓者乃鞫之款服友文自至官爲之營救與祖命併執之須臾來訴友文者百餘人擇其重罪一二事鞫之獄立具逮捕其黨二百餘人悉寘之法

### 因刀獲犯

元史

汪澤民字叔志徽之婺州人授平江路總管府推官有僧淨廣與他僧有憾久絕往來一日邀廣飲其弟子急欲得師財且苦其錮楚潛往他僧所殺之明日訴官他僧不勝拷掠乃誣服三經審錄詞無異結案待報澤民取行兇刀

視之刀上有鐵工姓名召工問之乃其弟子刀也一訊吐實卽械之而出他僧人驚以爲神

寬註誤民

元史

元明善字復初大名清河人董士選僉浙東樞密院事辟爲掾待之若賓友不敢以曹屬遇之及士選陞江西左丞又辟爲省椽會贛州賊劉貴反明善從士選將兵誅之擒賊三百人明善議緩註誤得全活者百三十人旣又得賊所書贛吉民丁十萬於籍者有司喜欲滋蔓爲利明善請火其籍以滅跡二郡遂安

開譬息訟

元史

周自強字剛善臨江新喻人爲婺州路義烏縣尹周知民情而性度寬厚不爲刻深民有以爭訟訴於庭者一見卽能知其曲直然未遽加以刑責必取經典中語反覆開譬若能悔悟首實則原其罪若怙惡不悛然後繩之以法民畏且愛獄訟頓息民間田稅之籍多失實故差徭不平自強出令履畝覆之民不能欺文簿井井可考於是賦役平均貧富樂業

勘案無私

元史

甯夏人有告買買等謀害太師伯顏者伯顏委自當等往甯夏鞠問無其情乃以誣罔坐告者罪伯顏怒自當前曰

太師所以令吾三人勘之者以國法所在也必以罪吾三人則自當實主其事宜獨當之伯顏乃左遷自當同知徽政院事自當厯事四朝衍衍在位剛介弗同終始一節有古遺直之風卒以是忤權貴不復柄用君子惜之

斬劫掠帥

元史

慶童字明德康里氏以勳臣子累遷平章政事行省江浙適盜起汝潁蔓延於江浙慶童往討之以次克復既乃令長吏按視民數凡註誤者悉置不問招徠流離俾安故業發官粟以賑之存活者甚眾會平江湖州陷義兵元帥方家奴以所部軍屯杭城之北關鉤結同黨相煽爲惡劫掠

財貨白晝殺人慶童言於丞相達識帖睦迺曰我師無律何以克敵必斬方家奴乃可出師丞相乃與慶童入其軍數其罪斬首以徇民大悅

### 立碎大珠

明史

楊靖字仲甯山陽人起進士累擢刑部尙書靖嘗鞫一武弁門卒檢其身得大珠僚屬驚異靖徐曰僞也安有珠大如此者立碎之帝聞歎曰靖此舉有四善焉不獻朕以求容悅一也不究其所投獻息大獄二也不獎門卒杜小人僥倖三也千金之珠猝然至前斥以爲僞而碎之有過人之智應變之才四也

平械鬪怨

明史

吳履字德基蘭谿人李文忠鎮浙東薦於朝授南康丞遷  
安化知縣大姓易氏保險自守江陰侯吳良將擊之履曰  
易氏逃死耳非反也招之當來不來誅未晚良從之易氏  
果至擢知澠州部民王瓊輝仇里豪羅玉成執其家人笞  
辱之玉成兄子玉汝不勝恚集年少千餘人圍瓊輝家奪  
之歸縛瓊輝道箠之濱死乃釋瓊輝兄弟五人庭訴辭指  
出血誓與羅氏俱死履念獄成當連千餘人勢不便乃召  
瓊輝語之曰獨羅氏圍爾家耶對曰千餘人曰千餘人皆  
辱爾耶曰數人耳曰汝憾數人而累千餘人可乎且眾怒

不可犯儻不顧死盡殺爾家而就逮雖有司有法懲治汝  
悔當何及瓊輝悟頓首惟命履乃捕操筆者四人於瓊輝  
前杖數十血流至踵命羅氏對瓊輝引罪拜之事遂解山  
東兵常以牛羊代秋稅履與民計曰牛羊有死瘠患不若  
輸粟便他日上官令民送牛羊之陝西他縣民多破家灘  
民獨完

明空印冤

明史

鄭士利字好義甯海人兄士元剛直有才學由進士歷官  
湖廣按察使僉事會考校錢穀冊書空印事覺凡主印者  
論死佐貳以上戍邊士元亦坐是繫獄時帝方盛怒以爲

欺罔丞相御史莫敢諫士利乃爲書數千言言數事而於空印事尤詳曰陛下欲深罪空印者恐奸吏得挾空印紙爲文移以虐民耳夫文移必完印乃可今考較書冊乃合兩縱印非一印一紙比縱得之亦不能行況不可得乎錢穀之數府必合省省必合部數難懸決至部乃定省府去部遠者六七千里近亦三四千里冊成而後用印往返非期年不可以故先印而後書此權宜之務所從來久何足深罪且國家立法必先明示天下而後罪犯法者以其故犯也自立國至今未嘗有空印之律有司相承不知其罪今一旦誅之何以使受誅者無詞朝廷求賢士置庶位得



之甚難位至郡守皆數十年所成就通達廉明之士非如  
草菅然可刈而復生也陛下奈何以不足罪之罪而壞足  
用之材乎帝覽書大怒下丞相御史雜問究主使者士利  
笑曰願吾書足用否耳吾業爲國家言事自分必死誰爲  
我謀獄具與士元皆輸作江浦而空印者竟多不免

別工匠罪

明史

薛祥字彥祥無爲人從俞通海來歸厯官工部尙書時造  
鳳陽宮殿帝坐殿中若有人持兵鬪殿脊者太師李善長  
奏諸工匠用厭鎮法帝將盡殺之祥爲分別交替不在工  
者並鐵石匠皆不預活者千數營謹身殿有司列中匠爲

上匠帝怒其罔命棄市祥在側爭曰奏對不實竟殺人恐  
非法得旨用腐刑祥復徐奏曰腐廢人矣莫若杖而使工  
帝從之

### 杖毆民卒

明史

歐陽銘字日新泰和人以薦知臨淄縣常遇春師過其境  
卒入民家取酒相毆擊一市盡譁銘笞而遣之卒訴令罵  
將軍遇春詰之銘曰卒王師民亦王民也民毆且死卒不  
當笞邪銘雖愚何至詈將軍將軍大賢奈何私一卒撓國  
法遇春意解爲責軍士以謝後大將軍徐達至軍士相戒  
曰是健吏曾抗常將軍者毋犯也

因蛙鞫罪

明史

熊鼎字伯穎臨川人歷官浙江按察司僉事平陽知州梅鑑坐贓民數百咸訴知州無罪鼎將聽之吏白鼎釋知州如故出何鼎歎曰法以誅罪吾敢畏譴誅無罪人乎釋鑑以情聞報如其奏甯海民陳德仲支解黎異異妻屢訴不得直鼎一日覽牒有青蛙立案上鼎曰蛙非黎異乎果異則止勿動蛙果勿動乃逮德仲鞫實立正其罪

察謀逆寃

明史

郎敏濟源人洪武初擢饒州府知府敏爲治廉而惠樂平民有詣闕愬邑大姓千餘家謀逆者詔指揮潘某率兵往

捕之兵至饒敏驚乃先往察之至樂平民皆耕牧如常時敏廉得愬者乃邑子以假貸不得怨諸大姓故重誣之敏還白潘不之信自往察視果如敏言於是各以其家長逮至京辨其誣詔釋之而誅妄愬者

赦冒糧將

明史

戶部左侍郎夏原吉請裁冗食平賦役嚴鹽法錢鈔之禁清倉場廣屯種以給邊蘇民且便商賈皆報可帝北巡命兼攝行在禮部兵部都察院事有二指揮冒月廩帝欲斬之原吉曰非律也假實爲盜將何以加乃止

查志考圖

明史

彭勛字祖期永豐人補建甯教授副使王增有疾醫者許宗道誣諸生游享魘魅以舍旁童五郎祠爲徵增怒寘亨家七人重罪下近祠居民獄四百家勛抗論游氏非巫者五郎非邪神初捐地築城人也事載郡志中增愕索圖經證之大慚悔事得解

按名知妄

明史

范希正字以貞吳縣人授曹縣知縣山東饑惟曹以希正先積粟得無患大理寺丞張驥振山東聞之因請升曹縣爲州而以希正爲知州從之時州民負官馬不能償多逃竄希正節公費代償九十餘匹逃者皆復業吉水人誣曹

富民殺其兄連坐甚眾希正密移吉水按其人姓名皆妄事得白治曹二十三年歷知州再考乃致仕

明日來

明史

趙豫字定素安肅人爲松江知府時衛軍恣橫豫執其尤者杖而配之邊眾遂帖然一意拊循與民休息擇良家子謹厚者爲吏訓以禮法均徭節費減吏員十之五在職十五年清靜如一日去郡老穉攀轅留一履以識遺愛後配享周忱祠方豫始至患民俗多訟訟者至輒好言諭之曰明日來眾皆笑之有松江太守明日來之謠及訟者踰宿忿漸平或被勸阻多止不訟

誅造誣囚

明史

鄭埜字孟質宜章人擢監察御史時車駕在北京有言南京錢法阻滯命埜往察懼成大獄埜往擒市豪一二歸奏曰鈔法已通矣上頷而罷之倭寇入遼東戍卒失律者百餘人皆應死埜爲開陳其可矜狀甚悉上然而宥之石州人有詣闕告變者曰州民與陝人羣聚千餘將謀不軌擢爲按察副使往理其事至察其誣乃反獄亡命者妄言冀脫死卽具以聞上命止勿問而誅其造誣者

釋民焚籍

明史

王得仁名仁以字行新建人官汀州府經歷廉能勤敏上

下愛之數辨冤獄卻饋遺抑鎮守內臣苛索政績益著沙縣賊陳正景故鄧茂七黨也糾清流賊藍得隆等攻城得仁與守將及知府劉能擊敗之斬正景餘賊驚潰諸將議窮搜得仁恐濫及百姓下令招撫辨釋難民三百人都指揮馬雄得通賊者姓名將按籍行戮得仁力請焚其籍

廉靜民安

明史

朱勝金華人累官蘇州知府廉靜精敏下不能欺嘗曰吏貪吾不多受牒隸貪吾不行杖獄卒貪吾不繫囚由是公庭清肅民安而化之居七年超遷江西左布政使

寬饑民罪

明史



侍郎章敞薦清河知縣李信圭擢知蘄州清河民詣闕乞  
留命以知州理縣事民有湖田數百頃爲淮安衛卒所奪  
民代輸租者六十年信圭奏之詔還民田饑民攘食人一  
牛御史論死八人信圭奏之免六人天久雨淮水大溢沒  
廬舍畜產甚眾信圭奏請振貸併停歲辦物件及軍匠廚  
役濬河人夫報可

安插流民

明史

原傑字子英陽城人歷戶部左侍郎時黃河遷決不常彼  
陷則此淤軍民就淤墾種姦徒指爲園場屯地獻王府邀  
賞王府輒據有之傑請獻者謫戍并罪受獻者從之江西

盜起以傑嘗再莅其地得民詔往治捕戮六百餘人餘悉解散荆襄流民數十萬朝廷以爲憂祭酒周洪謨嘗著流民圖說謂當增置府縣聽附籍爲編氓可實襄鄧戶口俾數百年無患帝善之遂命傑往撫之傑徧厯山溪宣朝廷德意諸流民欣然附籍於是大會湖廣河南陝西撫按官籍之得戶十一萬三千有奇其初至無產及頑梗不率者驅還其鄉附籍者用輕則定田賦民大悅因相地勢以襄陽所轄鄖縣居竹房上津商洛諸縣中道路四達去襄陽五百餘里山林阻深將吏鮮至猝有盜賊府難遙制乃拓其城置鄖陽府以縣附之且置湖廣行都司增兵設戍而

析竹山置竹谿析鄖置鄖西析漢中之洵陽置白河與竹  
山上津房咸隸新府又於西安增山陽南陽增南召桐柏  
汝州增伊陽各隸其舊府制既定薦知鄧州吳遠爲鄖陽  
知府諸縣皆擇鄰境良吏爲之流人得所四境乂安將還  
以地界湖廣河南陝西事無統紀因薦御史吳道宏自代  
詔卽擢道宏大理少卿撫治鄖陽襄陽荊州南陽西安漢  
中六府鄖陽之有撫治自此始也

單騎入峒

明史

孔鏞字韶文長洲人知高州府前知府劉海以猺警閉城  
門自護鄉民避猺至者輒不納還爲猺所戕又疑民陰附

賊輒戮之賊緣是激眾怒爲內應城遂陷鏞至開門納來者流亡日歸城不能容別築城東北居之時賊屯境內者凡十餘部而其魁馮曉屯化州鄧公長屯茅峒屢招不就鏞一日單騎從二人直抵茅峒去城十里許道遇賊徒令還告曰我新太守也公長驟聞新守至亟呼其黨環甲迎及見鏞坦易無騷從氣大沮鏞徐下馬入坐庭中公長率其徒弛甲羅拜鏞諭曰汝曹故良民迫凍餒耳前守欲兵汝吾今奉命爲汝父母汝我子也信我則送我歸資汝粟帛不信則殺我卽大軍至無遺種矣公長猶豫其黨皆感悟泣下鏞曰餒矣當食我公長爲跪上酒饌旣食曰日

且暮當止宿夜解衣酣寢賊相顧駭服再宿而返見道旁裸而懸樹上者纍纍詢之皆諸生也命盡釋之公長遣數十騎擁還城中人望見皆大驚謂知府被執來給降也盡登陴鏞止騎城外獨與羸卒入取穀帛使載歸公長益感激遂焚其巢率黨數千人來降公長旣降諸賊次第納款惟曉恃險不服鏞選壯士二百人乘夜抵化州曉倉皇走匿獲其妻子以歸撫恤甚厚曉亦降境內大定

寬鞭卒弁

明 史

詔右僉都御史王鼎提督遼東軍務鼎以軍令久弛寇至將士不力戰因諸將庭謁責以失律罪命左右曳出斬之

皆惶恐叩頭願効死贖罪。躬乃躬行邊起山海關抵開原。繕城垣濬溝塹五里爲堡十里爲屯。使烽燧相接。練將士。室鰥寡軍民大悅。指揮孫璟鞭殺戍卒其妻女哭之亦死。他卒訴璟殺一家三人。躬曰卒死法妻死夫死父非殺也。命璟償其家葬埋費。璟感激後參將遼東追敵三百里。事李秉爲名將。

妖言止杖

明史

高明字上達貴溪人。官御史。徐州民訴有司於朝。時越訴者戍邊。明言戍邊防誣訴也。今訴不誣法當杖。民有爲妖言者吏貪功誣以謀反。明按無反狀。止坐妖言律。皆報許。

饑民非劫

明史

周濟字大亨洛陽人擢御史大同鎮守中官以驕橫聞敕濟往廉之濟變服負薪入其宅盡得不法狀還報帝大嘉之出爲安慶知府歲比不登民間鬻子女充衣食方舟而去者相踵濟借漕糧以振而禁鬻子女者且上疏請免租稅饑民聚掠富家粟富家以盜劫告濟下令曰民饑故如此然得穀當報太守數太守當代爾償掠者遂解散

李福達獄

明史

馬錄字君卿信陽人以進士授御史出按山西而妖賊李福達獄起福達者崞人初坐妖賊王良李鉞黨戍山丹衛

逃還更名午爲清軍御史所勾再戍山丹衛復逃居洛川以彌勒教誘愚民邵進錄等爲亂事覺進祿伏誅福達先還家得免更姓名曰張寅往來徐溝間輸粟得太原衛指揮使子大仁大義大禮皆冒京師匠籍用黃白術干武定侯郭勛勛大信幸其仇薛良訟於錄按問得實檄洛川父老雜辨之益信勛爲遺書所免錄不從偕巡撫江潮具獄以聞且劾勛庇奸亂法章下都察院都御史聶賢等覆如錄奏力言勛等黨逆罪詔福達父子論死妻女爲奴沒其產責勛對狀郭勛者武定侯英元孫也世宗初掌團營大禮議起勛知上意首右張璁世宗大愛幸之勛復進方士



段朝用云以其所化金銀爲飲食器可不死帝益以爲忠至是勛懼乞恩因爲福達代辨帝置不問會給事中王科鄭一鵬等交章劾勛謂罪當連坐勛亦累自訴且以議禮觸眾怒爲言帝心動勛復乞張璫桂萼爲援璫萼素惡廷臣攻已亦欲借是舒宿憤乃謂諸臣內外交結借端陷勛將漸及諸議禮者帝深入其言而外廷不知攻勛益急帝益疑命取福達等至京下三法司訊旣又命會文武大臣更訊之皆無異詞帝怒仍下廷鞠尙書顏頤壽等不敢自堅改擬妖言律斬帝猶怒命法司俱戴罪辦事遣官往械錄潮及前問官布政使李璋按察使李珏事章綸都指

揮馬豸等時瑋珏已遷都御史瑋巡撫甯夏珏巡撫甘肅  
皆下獄廷訊乃反前獄抵良誣告罪帝以罪不及錄怒甚  
命聰夢方獻夫分署三法司事盡下尙書顧壽侍郎劉玉  
王啟左都御史聶賢副都御史劉文莊僉都御史張潤大  
理卿湯沐少卿徐文華顧泌寺丞汪淵獄嚴刑推問遂搜  
錄篋得大學士賈詠都御史張仲賢工部侍郎閔楷御史  
張英及寺丞淵私書詠引罪致仕去仲賢等亦下獄夢等  
上言給事中劉琦常泰郎中劉仕聲勢相倚挾私彈事佐  
錄殺人邇者言官締黨求勝內則奴隸公卿外則草芥司  
屬任情恣橫殆非一日請大奮乾斷彰國法帝納其言并

下諸人獄萼等遂肆榜掠錄不勝刑自誣故入人罪萼等  
乃定爰書言寅非福達錄等恨勛構成冤獄因列諸臣罪  
名帝悉從其言謫戍極邊良抵死眾證皆戍寅還職錄以  
故入人死未決當徒帝以爲輕欲坐以奸黨律斬萼等謂  
張寅未死而錄代之死恐天下不服宜永戍烟瘴地令緣  
及子孫乃戍廣西南丹衛遇赦不宥帝從之以萼等平反  
有功勞諭之文華殿賜二品服俸金帶銀幣給三代誥命  
遂編欽明大獄錄頒示天下是時刑部主事唐樞上疏言  
李福達之獄陛下駁勘再三誠古帝王欽恤盛心而諸臣  
負陛下欺蔽者肆其譏諛者洞其說畏威者變其辭訪

緝者淆其真是以陛下惑滋甚而是非卒不能明臣竊惟陛下之疑有六謂謀反罪重不宜輕加於所疑一也謂天下人貌有相似二也謂辭良言弗可聽三也謂李珣初牒明四也謂臣下立黨傾郭勛五也謂崱洛證佐皆讐人六也臣請一一辨之福達之出也始而王良李鉞從之其意何爲繼而惠慶邵進祿等師之其傳何事李鉞漢十月下旬之約其行何求我有天分數語其情何謀太上元天垂文秘書其辭何指劫庫攻城張旗拜爵雖成於進祿等其原何自鉞伏誅於前進祿敗露於後反狀甚明故陝西之人曰可殺京畿中無一人不曰可殺惟左右之人曰不可

殺則臣不得而知也鞫獄者曰誣必言所誣何因曰讐必  
言所讐何事若曰辭良讐也則一切證佐非讐也曰韓良  
相戚廣讐也則高尙節屈孔石文舉非讐也曰魏泰劉永  
振讐也則今布按府縣官非讐也曰山陝人讐也則京師  
道路之人非讐也此不用疑六也望陛下六疑盡釋明正  
福達之罪庶羣奸屏跡宗社幸甚疏入帝大怒斥爲民初  
桂萼等反李福達之獄舉朝不直萼等而以寅福達姓名  
錯互亦或疑之至四十五年正月四川大盜蔡伯貫就禽  
自言學妖術於山西李同所司檄山西捕同下獄同供爲  
李午之孫大禮之子世習白蓮教假稱唐裔惑眾倡亂與

大獄錄姓名無異同竟伏誅暨穆宗卽位御史龐尙鵬言  
據李同之獄福達罪益彰而當時流毒縉紳至四十餘人  
衣冠之禍可謂慘烈郭勛世受國恩乃黨巨盜陷朝紳職  
樞要者承其頤指鍛鍊周內萬一陰蓄異謀人人聽命禍  
可勝言哉乞追奪勛等官爵優卹馬錄諸人以作忠良之  
氣由是福達獄始明

陳洸獄

明史

葉應驄字肅卿鄞人官刑部郎中時給事中潮陽陳洸素  
無賴家居與知縣宋元翰不相能令其子柱訐元翰謫戍  
元翰撫洸罪及帷薄事刊布之名辨冤錄洸由是不齒於

清議尙書喬宇出之爲湖廣僉事洸初嘗言獻帝不可稱  
皇而是時張璉桂萼輩以議禮驟顯洸乃上疏言璉等議  
是宜急去本生之稱因詆宇及文選郎夏良勝帝卽還洸  
等職謫良勝於外光遂劾大學士費宏吏部尙書楊旦等  
帝益大喜立罷旦擢廖紀代之璉萼輩遂引以擊異已給  
事中趙漢御史朱衣等交章劾洸且封上元翰辨冤錄都  
御史王時中請罷洸聽勘洸奏羣奸恨臣抗議大禮將令  
撫按殺臣請遣一錦衣往洸意錦衣可利誘也得旨遣應  
驄及錦衣千戶李經應驄與焚香誓天會御史熊蘭涂相  
等雜治具上洸罪狀至百七十二條除赦前及曖昧者勿

論當論者十三條罪大惡極宜斬妻離異子柱絞洸懼亡  
詣闕申訴帝持應驄奏不下尙書趙鑑副都御史張潤給  
事中解一貫御史鄭本公等連章執奏帝不得已始命覆  
覈郎中黃綰力持應驄議席書與萼爲居間不能得要璉  
共奏謂洸議禮臣爲法官所中帝入其言命免罪爲民會  
廷臣馬錄等以劾郭勛下獄洸謂乘此故案可翻也上書  
訐應驄等萼因訟洸冤遂逮洸應驄元翰綰而令按察使  
張祐等還籍候命詞連四百人九卿及錦衣衛廷訊應驄  
對曰某所持者王章耳必欲直洸惟諸公命刑部尙書胡  
世甯等心知洸罪重而懲前大獄不敢執乃當應驄按事



不實律爲民元翰綰等貶斥有差洸授冠帶霍韜再疏爲  
洸訟不能得洸益憾應驄逾數年更令人奏應驄勘獄時  
酷殺無辜二十六人下巡按李美覆勘美言死者皆有狀  
非故殺刑部尙書許讚白應驄無罪帝特謫應驄戍遼東  
是獄也始終八載凡攻洸與治洸獄者無不得罪逮捕至  
百數十人天下惡莠輩奸橫益羞言議禮臣矣應驄遇赦  
歸明堂大享禮成復冠帶應驄敦行誼好著書數更患難  
氣不挫

宗室奪掠

明 史

周思兼字叔夜華亭人官平度知州躬巡郊野坐藍輿中

攜飯一盂令鄉民以次舁行因盡得閭閻疾苦狀悉蠲除之王府奄人縱莊奴奪民產監司杖奴斃奄迫王奏聞巡撫彭黯令思兼讞之思兼閱獄詞曰此決杖不如法罪當杖以王故加一等奄誣告罪當戍以王故末減監司竟得復故秩旁郡饑民掠食所司持之急且爲亂上官檄思兼治之作小木牌數千散四郊令執牌就撫悉振以錢穀事遂定舉治行第一擢湖南僉事岷府宗室五人封爵皆將軍殺人掠貲財監司避不入武岡者二十年思兼廉得奸狀縛其黨悉繫之獄五人藏利刃入思兼與揖而捫其臂曰吾爲將軍百口計將軍乃爲此曹死邪皆沮退乃列其

罪奏聞悉錮之高牆還田宅子女於民

法治戚畹

明史

劉濟字汝楫騰驤衛人官吏科給事中后父陳萬言奴何璽毆人死帝命釋之濟執奏曰萬言縱奴殺人得免爲幸乃并釋璽等是法不行於戚畹奴也

法治中官

明史

林聰字季聰甯德人官都給事中會中官單增督京營有寵朝士稍忤者輒遭辱家奴白晝殺人奪民產侵商稅聰發其奸下詔獄獲宥增自是不敢肆

奸僧冒王

明史

王世貞爲右僉都御史撫治鄖陽有奸僧僞稱樂平王次子奉高皇帝御容金牒行游天下世貞曰宗藩不得出城而譟張如此必僞也捕訊之服辜張居正柄國居正婦弟辱江陵令世貞論奏不少貸居正不能堪取旨罷之

### 木偶躍舟

明史

戚賢字秀夫全椒人官歸安知縣縣有蕭總管廟報賽無虛日會久旱賢禱不驗沈木偶於河居數日舟過其地木偶躍入舟舟人大驚賢徐笑曰是特未焚耳趣焚之潛令健隸入岸傍社誡之曰水中有人出械以來已果獲數人蓋奸民募善泅者爲之也召爲吏科給事中

出入不平

明史

先是徐階定方士王金等獄坐妄進藥物比子殺父律論死詔下法司會訊刑部尙書葛守禮等議金妄進藥無事實但習故陶仲文術左道惑眾應坐爲從律編戍給事中趙奮言法司爲天下平昔則一主於入而不爲先帝地今則一主於出而不恤後世議罪有首而後有從金等爲從孰爲首將以陶仲文爲首則仲文死已久爲法如此陛下何賴哉疏入報聞

定亂貴速

明史

張佳胤字肖甫銅梁人官兵部右侍郎會浙江巡撫吳善

言奉詔減月餉東西二營兵馬文英劉廷用等構黨大譟  
縛毆善言張居正以佳胤才令兼右僉都御史代善言甫  
入境而杭民以行保甲故亦亂佳胤問告者亂兵與亂民  
合乎曰未也佳胤曰速驅之尙可離爲二也旣至文英廷  
用自縛請死佳胤慰遣之且曰汝曹毋反反則移六師至  
族汝矣且汝必有所苦眾以司夜役告佳胤卽下令除之  
眾雖陽散乘夜復大掠佳胤乃召文英廷用密謂曰自縛  
而請者汝邪壯士故不畏死今市中無賴爲亂彼無他勞  
不可以汝曹例汝爲我倡眾捕亂功成詎論贖且有賞卽  
不幸死死義終有名今奈何不令天下稱義士而稱叛卒

乎二人踴躍聽命遂前薄亂民反縛詣臺者百五十人訊得倡謀挾刃腰金帛者五十餘人皆梟之餘放歸佳胤復謂二人曰功差足贖矣予之冠帶榜於營曰還而餉餉如趙尙書時咸帖然服密廉得倡亂者七人斬之復捕文英廷用至曰汝故自祈死今得死晚矣又斬之二亂乃定

力除豪猾

明史

陳幼學字志行無錫人授確山知縣政務惠民積粟萬二千石以備荒墾萊田八百餘頃給貧民牛五百餘頭蠲黃河退地百三十餘頃以賦民里婦不能紡授紡車八百餘輛置屋千二百餘間分處貧民布政使劉渾成弟燦成助

妾殺妻治如律行太僕卿陳耀文家人犯法立捕治之汝甯知府邱度慮幼學得禍言於撫按調繁中牟秋成時飛蝗蔽天幼學捕蝗得千三百餘石乃不爲災縣南荒地多茂草根深難墾令民投牒者必入草十斤未幾草盡得沃田數百頃悉以畀民有大澤積水占膏腴地二十餘里幼學疏爲池者五十七爲渠者百三十九俱引入小清河民大獲利稍遷湖州知府甫至卽捕殺豪惡奴有施敏者士族子楊陞者人奴也橫郡中幼學執敏置諸獄敏賂貴人囑巡撫檄取親鞫幼學執不予立杖殺之他奸豪復論殺數十輩獨楊陞畏禍斂跡置之已念已去陞必復逞遂捕



置之死一郡大治詔加按察副使督九江兵備

微服被扶

明史

瞿汝稷字元立常熟人官刑部主事扶溝知縣扶宗人神宗令予重比汝稷曰是微服至邑庭官自扶扶溝民耳讞上竟得釋厯辰州知府永順土司彭元錦助其弟保靖土司象坤與酉陽冉御龍相仇殺汝稷馳檄元錦解兵去三土司皆安